

四庫全書

史部

欽定四庫全書

史部  
通志卷十九

詳校官侍讀<sub>臣</sub>陳萬青

編修<sub>臣</sub>裴謙履勘

覆校官助教<sub>臣</sub>金學詩

校對官博士<sub>臣</sub>劉光第

謄錄舉人<sub>臣</sub>蔣傳馨

欽定四庫全書

通志卷十九

宋右迪功郎鄭樵漁仲撰

后妃傳第一

前漢

高祖呂皇后

戚夫人

孝惠張皇后

高祖薄姬

孝

文竇皇后

兄長君弟少君

孝景薄皇后

孝景王皇后

孝武陳皇后

孝武衛皇后

孝武尹婕妤

邢夫人

孝武鉤弋趙婕妤 孝武李夫人 孝昭上官皇

后 榮安 衛太子史良娣 史皇孫王夫人 孝宣許

皇后 孝宣霍皇后 孝宣王皇后 孝元王皇

后 孝成許皇后 孝成班婕妤 孝成趙皇后

孝元傅昭儀 定陶丁姬 孝哀傅皇后 孝

元馮昭儀 中山衛姬 孝平王皇后

後漢 公主附

光武郭皇后 光烈陰皇后 明德馬皇后 賈貴人



章德竇皇后

梁貴人

和帝陰皇后

和熹鄧皇后

安思閭皇后

順烈梁皇后

虞美人陳夫人

孝崇匱皇后

桓懿獻梁皇后

桓鄧皇后

桓思竇皇后

孝仁董皇后

靈帝宋皇后

靈思何皇后

王美人

弘農王唐姬

獻帝伏皇后

獻穆曹皇后

魏

武宣卞皇后

文昭甄皇后

文德郭皇后

明

悼毛皇后

明元郭皇后

蜀

先主甘皇后 先主穆皇后 後主敬哀皇后

後主張皇后

吳

孫破虜吳夫人 吳景 吳主權謝夫人 謝承 吳主權徐夫

人 徐琨 吳主權步夫人 吳主權王夫人 吳主權

王夫人 吳主權潘夫人 孫亮全夫人 孫休

朱夫人 孫和何姬 孫皓滕夫人

前漢

班固曰自古受命帝王及繼體守文之君非獨內德茂也蓋亦有外戚之助焉夏之興也以塗山而桀之放也用末喜殷之興也以有娥及有嬖而紂之滅也嬖妲己周之興也以姜嫄及大任大姒而幽王之禽也淫褒姒故易基乾坤詩首關雎書美釐降春秋譏不親迎夫婦之際人道之大倫也禮之用唯婚姻為兢兢夫樂調而四時和陰陽之變萬物之統也可不慎與人能弘道末

如命何甚哉妃匹之愛君不能得之臣父不能得之子  
况卑下乎既驩合矣或不能成子姓成子姓矣而不能  
要其終豈非命也哉孔子罕言命蓋難言之非通幽明  
之變惡能識乎性命漢興因秦之稱號帝母稱皇太后  
祖母稱太皇太后適稱皇后妾皆稱夫人又有美人良  
人八子七子長使少使之號焉至武帝制婕妤嬪娥倢  
儻充依各有爵位而元帝加昭儀之號凡十四等云昭  
儀位視丞相爵比諸侯王婕妤視上卿比列侯嬪娥視

中二千石比關內侯僭華視真二千石比大上造美人  
視二千石比少上造八子視千石比中更充依視千石  
比左更七子視八百石比右庶長良人視八百石比左  
庶長長使視六百石比五大夫少使視四百石比公乘  
五官視三百石順常視二百石無涓共和娛靈保林良  
使夜者皆視百石上家人子中家人子視有秩斗食云  
五官以下葬司馬門外

高祖呂皇后父呂公單父人也好相人高祖微時呂公

見而異之乃以女妻高祖生惠帝魯元公主高祖為漢  
王元年封呂公為臨泗侯二年立孝惠為太子後漢王  
得定陶戚姬愛幸生趙隱王如意太子為人仁弱高祖  
以為不類已常欲廢之而立如意言如意類我戚姬常  
從上之關東日夜啼泣欲立其子呂后年長常留守希  
見益踈如意且立為趙王留長安幾代太子者數賴公  
卿大臣爭之及叔孫通諫用留侯之策得無易呂后為  
人剛毅佐高祖定天下兄二人皆為列將從征伐長兄

澤為周呂侯次兄釋之為建城侯逮高祖而侯者三人  
高祖四年臨泗侯呂公薨高祖崩惠帝立呂后為皇太  
后廼令永巷囚戚夫人髡鉗衣赭衣令舂戚夫人舂且  
歌曰子為王母為虜終日舂薄暮常與死為伍相離三  
千里當誰使告女太后聞之大怒曰乃欲倚女子邪乃  
召趙王誅之使者三反趙相周昌不遣太后召趙相相  
徵至長安使人復召趙王王來惠帝慈仁知太后怒自  
迎趙王霸上入宮挾與起居飲食數月帝晨出射趙王

不能早起太后伺其獨居使人持鴈飲之遲帝還趙王  
死太后遂斷戚夫人手足去眼熏耳飲瘖藥使居鞠域  
中名曰人彘居數月乃召惠帝視人彘帝視而問知其  
戚夫人乃大哭因病歲餘不能起使人請太后曰此非  
人所為臣為太后子終不能復治天下以此日飲為淫  
樂不聽政七年而崩太后發喪哭而泣不下留侯子張  
辟疆為侍中年十五謂丞相陳平曰太后獨有帝令哭  
而不悲君知其解未陳平曰何解辟疆曰帝無壯子太



后畏君等今請拜吕台吕產為將將兵居南北軍及諸  
吕皆官居中用事如此則太后心安君等幸脫禍矣丞  
相如辟疆計請之太后說其哭甚哀吕氏權由此起乃  
立孝惠後宮子為帝太后臨朝稱制復殺高祖子趙幽  
王友共王恢及燕靈王建遂立周吕侯子台為吕王台  
弟產為梁王建城侯釋之子禄為趙王台子通為燕王  
又封諸吕凡六人皆為列侯追尊父吕公為吕宣王兄  
周吕侯為悼武王太后八年春祓還道見物如犬據其

掖卜云趙王如意為祟遂病掖傷病困以趙王祿為上將軍居北軍梁王產為相國居南軍戒產祿曰高祖與大臣約非劉氏王者天下共擊之今王呂氏大臣不平我即崩恐其為變必據兵衛宮慎毋送喪為人所制太后崩太尉周勃丞相陳平朱虛侯劉章等共誅產祿悉捕諸呂男女無少長皆斬之迎立代王是為孝文皇帝孝惠張皇后宣平侯敖女也敖尚帝姊魯元公主生后惠帝即位呂太后欲為重親以公主女配帝為皇后欲

其生子萬方終無子乃使陽為有身取後宮美人子名之殺其母立所名子為太子惠帝崩太子立為帝四年乃自知非皇后子出言曰太后安能殺吾母而名我我壯即為所為太后聞而患之恐其作亂乃幽之永巷帝病甚左右莫得見太后下詔廢之語在高后紀遂幽死更立恒山王弘為皇帝而以呂祿女為皇后欲連根固本牢甚然而無益也呂太后崩大臣正之卒滅呂氏少帝恒山淮南濟川王皆以非孝惠子誅獨置孝惠皇后

廢處北宮孝文後元年薨葬安陵不起墳

高祖薄姬文帝母也父吳人秦時與故魏王宗家女魏媼通生薄姬而薄姬父死山陰因葬焉及諸侯叛秦魏豹立為魏王而魏媼內其女於魏宮許負相薄姬當生天子是時項羽方與漢王相距滎陽天下未有所定豹初與漢擊楚及聞許負言心獨喜因背漢而中立與楚連和漢使曹參等虜魏王豹以其國為郡而薄姬輸織室漢王入織室見薄姬有色詔內後宮歲餘不得幸始

姬少時與管夫人趙子兒相愛約曰先貴無相忘已而  
管夫人趙子兒先幸漢王漢王四年王坐河南宮成臯  
靈臺此二美人侍相與笑薄姬初時約漢王問其故俱  
以實告漢王心悽然憐薄姬是日召欲幸之對曰昨暮  
夜夢蒼龍據妾胸上曰此貴徵也吾為汝遂成之一幸  
生男是為代王其後希見高祖崩諸御幸姬戚夫人之  
屬呂后皆幽之不得出宮而薄姬以希見故得出從子  
之代為代王太后其弟薄昭從如代代王立十七年高

皇后崩大臣議立後疾外家呂氏彊暴皆稱薄氏仁善故立代王為皇帝尊太后為皇太后封弟薄昭為軹侯太后母亦前死葬櫟陽北乃追尊太后父為靈文侯會稽郡置園邑三百家長丞已下使奉守寢廟上食祠如法而櫟陽亦置靈文夫人園令如靈文侯園儀太后早失父其奉太后外家魏氏有力乃召復魏氏賞賜各以親疏受之薄氏侯者一人太后後文帝二歲孝景前二年崩葬南陵用呂后不合葬長陵故特自起陵近孝文

霸陵

孝文竇皇后景帝母也趙之清河觀津人呂后時以良家子選入宮侍太后太后出宮人以賜諸王各五人竇姬與在行中家在清河願如趙近家請其主遣宦者吏必置我籍趙之伍中宦者忘之誤置籍代伍中籍奏詔可當行竇姬泣涕怨其宦者不欲往相彊乃肯行至代代王獨幸竇姬生女嫫孝惠七年生景帝代王王后生四男先代王未入立為帝而王后卒及代王為帝後王

后所生四男更病死文帝立數月公卿請立太子而竇  
姬男最長立為太子竇姬為皇后嫖為館陶長公主明  
年封少子武為代王後徙梁是為梁孝王竇皇后親早  
卒葬觀津於是薄太后詔追封竇皇后父為安成侯母  
曰安成夫人令清河置園邑二百家長丞奉守比靈文  
園法竇后兄長君弟曰廣國字少君年四五歲家貧為  
人所畧賣其家不知其處傳十餘家至宜陽為其主人  
入山作炭暮臥岸下百餘人岸崩盡壓殺臥者少君獨



脫不死自卜數日當為侯從其家之長安聞皇后新立家在觀津姓竇氏廣國去時雖少識其縣名及姓又嘗與其姊採桑墮用為符信上書自陳竇皇后言之於文帝召見問之具言其故果是又復問他以何為驗對曰姊去我西時與我決於傳舍中勾沭沭我請食飯我乃去於是竇后持之而涕泣交橫下侍御左右皆伏地泣助皇后悲哀乃厚賜金錢田宅家於長安絳侯灌將軍等曰吾屬不死命乃且縣此兩人兩人所出微不可不

為擇師傳賓客又復效呂氏大事也於是乃選士之有節行者與居竇長君少君用此為退讓君子不敢以尊貴驕人竇皇后疾失明文帝所幸邯鄲慎夫人尹姬皆無子文帝崩景帝立皇后為皇太后封廣國為章武侯長君前死封其子彭祖為南皮侯吳楚反太后從昆弟子竇嬰俠喜士為大將軍破吳楚封魏其侯竇氏凡三人侯竇太后好黃帝老子言景帝及諸竇不得不讀黃帝老子而尊其術太后後景帝六歲凡立五十一年建

元六年崩合葬霸陵遺詔盡以東宮金錢財物賜長公主嫖至孝武帝時魏其侯竇嬰為丞相後誅

孝景薄皇后孝文薄太后家女也景帝為太子時薄太后取以為太子妃景帝立立薄妃為皇后無子無寵立六年薄太后崩皇后廢廢後四年薨葬長安城東平望亭南

孝景王皇后武帝母也槐里人母曰臧兒故燕王臧荼孫也嫁為槐里王仲妻生男信與兩女而仲死臧兒更

嫁長陵田氏生男蚡勝臧兒長女嫁為金王孫婦生一女矣而臧兒卜筮之曰兩女皆當貴因欲倚兩女乃奪金氏金氏怒不肯與決乃內之太子宫太子幸愛之生三女一男男方在身時王夫人夢日入其懷以告太子太子曰此貴徵也未生而文帝崩景帝即位王夫人生男是時薄皇后無子後數歲景帝立齊栗姬男為太子而王夫人男為膠東王長公主嫖有女欲與太子為妃栗姬妬而景帝諸美人皆因長公主見得貴幸栗姬曰

怨怒謝長主不許長主欲與王夫人王夫人許之會薄  
皇后廢長公主日譖栗姬短景帝嘗屬諸姬子曰吾百  
歲後善視之栗姬怒不肯應言不遜景帝心銜之而未  
發也長公主日譽王夫人男之美帝亦自賢之又耳曩  
者所夢日符計未有所定王夫人又陰使人趣大臣立  
栗姬為皇后大行奏事文曰予以母貴母以子貴今太  
子母號宜為皇后帝怒曰是乃所當言邪遂案誅大行  
而廢太子為臨江王栗姬愈恚不得見以憂死卒立王

夫人為皇后男為太子封皇后兄信為蓋侯初皇后始入太子家後女弟兒姁亦復入生四男兒姁早卒四子皆為王皇后長女為平陽公主次南宮公主次隆慮公主皇后立九年景帝崩武帝即位為皇太后尊太后母臧兒為平原君封田蚡為武安侯勝為周陽侯王氏田氏侯者凡三人蓋侯信好酒田蚡勝貪巧於文辭蚡至丞相追尊王仲為共侯槐里起園邑二百家長丞奉守及平原君薨從田氏葬長陵亦置園邑如共侯法初皇

太后微時所為金玉孫生女俗在民間蓋諱之也武帝始立韓嫣白之帝曰何為不早言乃車駕自往迎其家在長陵小市直至其門使左右入求之家人驚恐女逃匿扶將出拜帝下車立曰大姊何藏之深也載至長樂宮與俱謁太后太后垂涕女亦悲泣帝奉酒前為壽錢千萬奴婢三百人公田百頃甲第以賜姊太后謝曰為帝費因賜湯沐邑號修成君男女各一人女嫁諸侯男號修成子仲以太后故橫於京師太后凡立二十五年

後景帝十五歲元朔三年崩合葬陽陵

孝武陳皇后長公主嫖女也曾祖父陳嬰與項羽俱起  
後歸漢為堂邑侯傳子至孫午午尚長公主生女初武  
帝得立為太子長主有力取主女為妃及帝即位立為  
皇后擅寵驕貴十餘年而無子聞衛子夫得幸幾死者  
數焉上愈怒后又挾婦人媚道頗覺元光五年上遂窮  
治之女子楚服等坐為皇后巫蠱祠祭祝詛大逆無道  
相連及誅者三百餘人楚服梟首於市使有司賜皇后



策曰皇后失序惑於巫祝不可以承天命其上璽綬罷  
退居長門宮明年堂邑侯午薨主男湏嗣侯主寡居私  
近董偃十餘年主薨湏坐淫亂兄弟爭財當死自殺國  
除後數年廢后廼薨霸陵郎官亭東

孝武衛皇后字子夫生微也其家號曰衛氏出平陽侯  
邑子夫為平陽主謳者武帝即位數年無子平陽主求  
良家女十餘人飾置家帝被霸上還過平陽主見所  
侍美人帝不說既飲謳者進帝獨說子夫帝起更衣子

夫侍尚衣軒中得幸還坐歡甚賜平陽主金千斤主因奏子夫送入宮子夫上車主拊其背曰行矣彊飯勉之即貴願無相忘入宮歲餘不復幸武帝擇宮人不中用者斥出之子夫得見涕泣請出上憐之復幸遂有身尊寵召其兄衛長君弟青侍中而子夫生三女元朔元年生男據遂立為皇后先是衛長君死乃以青為將軍擊匈奴有功封長平侯青三子在襁褓中皆為列侯及皇后姊子霍去病亦以軍功為冠軍侯至大司馬驃騎將

軍青為大司馬大將軍衛氏支屬侯者五人青還尚平陽主皇后立七年而男立為太子後色衰趙之王夫人中山李夫人有寵皆早卒後有尹婕妤鉤弋夫人更幸衛后立三十八年遭巫蠱事起江充為姦太子懼不能自明遂與皇后共誅充發兵兵敗太子亡走詔遣宗正劉長樂執金吾劉敢奉策收皇后璽綬自殺黃門蘇文姚定漢輿置公車令空舍盛以小棺瘞之城南桐柏衛氏悉滅宣帝立乃改葬衛后追諡曰思后置園邑三百

家長丞周衛奉守焉

孝武尹夫人號健仔邢夫人號姪娥俱為武帝所幸有詔不得相見尹夫人自請於帝曰願見邢夫人帝許之即令他夫人篩從御者數十人來前尹夫人望見之曰此非邢夫人身也帝曰何以言之對曰視其形狀不足以當人主矣於是帝乃使邢夫人衣故衣獨身來前尹夫人望見之曰此真是矣於是乃低頭俛而泣自痛其不如也諺曰美女入室惡女之仇褚先生曰浴不必江

海要之去垢馬不必騏驎要之善走士不必賢世要之知道女不必貴種要之貞好傳曰女無美惡入宮見妬士無賢不肖入朝見嫉美女者惡女之仇豈不然哉

孝武鉤弋夫人趙婕妤昭帝母也河間人武帝巡狩過河間望氣者言此有奇女天子亟使使召之既至女兩手皆拳上自披之手即時伸由是得幸號曰拳夫人先是其父坐法官刑為中黃門死長安葬雍門拳夫人進為婕妤居鉤弋宮大有寵本始三年生昭帝號鉤弋子

任身十四月乃生上曰聞昔堯十四月而生今鉤弋亦然乃命其所生門曰堯母門及衛太子敗而燕王旦廣陵王胥多過失寵姬王夫人男齊懷王李夫人男昌邑哀王皆早薨鉤弋之子年五六歲壯大多知上常言類我又感其生與衆異甚奇愛之心欲立焉上居甘泉宮召畫工圖畫周公負成王於是左右羣臣知武帝欲立少子也後數日上幸甘泉以微過譴責鉤弋婕妤婕妤脫簪珥叩頭帝曰引持去送掖廷獄婕妤還顧帝曰趣

行汝不得活倖死雲陽宮時暴風揚塵百姓傷感使  
者夜持棺往葬之封識其處其後帝閑居問左右曰人  
言云何對曰人言且立其子何去其母乎帝曰然非兒  
曹愚人所知也往古國家所以亂者由主少母壯也女  
主獨居驕蹇姪亂自恣莫能禁也汝不聞呂后邪故諸  
為武帝生子者無男女其母無不譴死未幾帝疾病乃  
立鉤弋子為皇太子拜奉車都尉霍光為大司馬大將  
軍輔少主以所畫周公負成王像賜之既而帝崩昭帝

即位追尊鉤弋婕妤為皇太后發卒二萬人起雲陵邑三千戶追尊外祖趙父為順成侯詔右扶風置園邑二百家長丞奉守如法順成侯有姊君姁賜錢二百萬奴婢第宅以充實焉諸昆弟各以親疏受賞賜趙氏無在位者唯趙父得封

孝武李夫人本以倡進初夫人兄延年性知音律善歌舞武帝愛之每為新聲變曲間者莫不感動延年侍上起舞歌曰北方有佳人絕世而獨立一顧傾人城再顧



傾人國寧不知傾城與傾國佳人難再得上歎息曰善  
世豈有此人乎平陽主因言延年有女弟上乃召見之  
實妙麗善舞由是得幸生一男是為昌邑哀王李夫人  
少而早卒上憐憫焉圖畫其形於甘泉宮及衛思后廢  
後四年武帝崩大將軍霍光緣上雅意以李夫人配食  
追上尊號曰孝武皇后初李夫人病篤上自臨候之夫  
人蒙被謝曰妾久寢病形貌毀壞不可以見帝願以王  
及兄弟為託上曰夫人病甚殆將不起一見我屬託王

及兄弟豈不快哉夫人曰婦人貌不修飾不見君父妾不敢以燕嬪見帝上曰夫人但一見我將加賜千金而與兄弟尊官夫人曰尊官在帝不在一見上復言欲必見之夫人遂轉鄉欵獻而不復言於是上不悅而起夫人姊妹皆讓之曰貴人獨不可一見上屬託兄弟邪何為恨上如此夫人曰所以不欲見帝者乃欲以深託兄弟也我以容貌之好得從微賤愛幸於上夫以色事人者色衰則愛弛愛弛則恩絕上所以孿孿顧念我者孿

全反又  
讀作戀

乃以平生容貌也今見我毀壞顏色非故必且

畏惡吐弃我意尚肯復追思閔錄其兄弟哉及夫人卒

上以后禮葬之其後上以夫人兄廣利為貳師將軍封

海西侯延年為協律郎都尉上思念夫人不已有方士

齊人李少翁言能致其神乃夜張燈燭設帷帳陳酒肉

而令上居他帳遙望見好女如李夫人之貌還幄坐而

步又不得就視上愈益相思悲感為作詩曰是邪非邪

立而望之偏何姍姍其來遲

姍先  
安反

令樂府諸音家絃歌

之上又自作賦以悼之其後李延年弟季坐姦亂後宮  
廣利降匈奴家族滅矣

孝昭上官皇后祖父桀隴西上邽人也少時為羽林期  
門郎從武帝上甘泉天大風車不得行解蓋授桀桀奉  
蓋雖風常屬車雨下蓋輒御上奇其材力遷未央廐令  
上嘗體不安及愈見馬馬多瘦上大怒令曰以我不復  
見馬邪欲下吏桀頓首曰臣聞聖體不安日夜憂懼意  
誠不在馬言未卒泣數行下上以為忠由是親近為侍

中稍遷至太僕武帝疾病以霍光為大將軍桀為左將  
軍皆受遺詔輔少主昭帝始立年八歲帝長姊鄂邑蓋  
公主居禁中共養帝蓋主私近子客河間丁外人上與  
大將軍間之不絕主驪有詔外人侍長主長主內周陽  
氏女令配耦帝時上官安有女即霍光外孫安欲因光  
內之光以為尚幼不聽安素與丁外人善說外人曰間  
長主內女安子容貌端正誠因長主得入為皇后以臣  
父子在朝而有椒房之重成之在於足下漢家故事常

以列侯尚主足下何憂不封侯乎外人喜言於長主長  
主以為然詔召安女入為婕妤安為騎都尉月餘遂立  
為皇后年甫六歲安以后父封桑樂侯遷車騎將軍日  
以驕淫受賜殿中出對賓客言與我壻飲大樂見其服  
飾使人歸自欲燒物安醉則裸行內與後母及父諸良  
人侍御皆亂其子病死仰而罵天數守

守謂求  
請也

大將軍

光為丁外人求侯及桀欲妄官祿外人光執正皆不聽  
又桀妻父所幸充國為太醫監闢入殿中下獄當死冬

月且盡蓋主為充國入馬二十疋贖罪廼得減死論由是桀安父子深怨光而重德蓋主知燕王旦帝兄不得立怨望桀安即記光過失予燕王令上書告之又為丁外人求侯燕王大喜上書稱子路喪姊期而不除孔子非之子路曰由不幸寡兄弟不忍除之故曰觀過知仁今臣與陛下獨有長公主為姊陛下幸使丁外人侍之外人宜蒙爵號書奏上以問光光執不許又告光罪過上又疑之愈親光而疏桀安桀安寢恚遂結黨與謀殺

光誘徵燕王至而誅之因廢帝而立桀或曰當如皇后何安曰逐廢之狗當顧菟邪且用皇后為尊一旦人主意有所移雖欲為家人亦不可得此百世之一時也事發覺燕王蓋主皆自殺桀安宗族皆滅皇后以年少不與謀復光外孫故得不廢皇后母前死葬茂陵郭東追尊曰敬夫人置園邑二百家長丞奉守如法皇后自使私奴婢守桀安冢光欲皇后擅寵有子帝時體不安左右及醫皆阿意言宜禁內雖宮人使令皆為窮袴多其



帶故後宮莫有進者皇后立十歲而昭帝崩后年十四  
五云昌邑王賀徵即位尊為皇太后光與皇太后共廢  
王賀立孝宣帝宣帝即位為太皇太后凡立四十七年  
年五十二建昭二年崩合葬平陵

衛太子史良娣宣帝祖母也太子有妃有良娣有孺子  
妻妾凡三等子皆稱皇孫史良娣家本魯國有母貞君  
兄恭以元鼎四年入為良娣生男進號史皇孫武帝末  
巫蠱事起衛太子及良娣史皇孫皆遭害史皇孫有一

男號皇曾孫時生數月猶坐太子繫獄積五歲乃遭赦  
治獄使者郅吉憐皇曾孫無所歸載以付史恭恭母貞  
君年老見孫孤甚哀之自養視焉後曾孫收養掖庭遂  
登至尊位是為宣帝而貞君及恭已死恭三子皆以舊  
恩封長子高為樂陵侯曾為將陵侯元為平臺侯及高  
子丹以功德封武陽侯史氏侯者凡四人高至大司馬  
車騎將軍丹大將軍自有傳

史皇孫王夫人宣帝母也名翁須太始中得幸於史皇

孫皇孫妻妾無號位皆稱家人子征和二年生宣帝帝  
生數月衛太子皇孫敗家人子皆坐誅莫有收葬者唯  
宣帝得全宣帝即位追尊母王夫人諡曰悼后祖母史  
良娣曰戾后皆改葬起園陵長丞奉守地節三年求得  
外祖母王媼媼男無故無故弟武皆隨使者詣闕時乘  
黃牛車故百姓謂之黃牛媼初上即位數遣使者求外  
家久遠多似類而非是既得王媼令太中大夫任宣與  
丞相御史屬雜考問鄉里知識者皆曰王媼媼言名妾

人家本涿郡蠡吾平鄉年十四嫁為同鄉王更得妻更  
得死嫁為廣望王廼始婦產子男無故武女翁須翁須  
年八九歲時寄居廣望節侯子劉仲卿宅仲卿謂廼始  
曰予我翁須自養長之媼為翁須作縑單衣送仲卿家  
仲卿教翁須歌舞往來歸取冬夏衣居四五歲翁須來  
言邯鄲賈長兒求歌舞者仲卿欲以我予之媼即與翁  
須逃走之平鄉仲卿載廼始共求媼媼惶急將翁須歸  
曰兒居君家非受一錢也奈何欲予他人仲卿詐曰不

也後數日翁須乘長兒車馬過門呼曰我果見行當之  
柳宿媼與廼始之柳宿見翁須相對涕泣謂曰欲為女  
自言翁須曰母置之何家不可以居自言無益也媼與  
廼始還求錢用隨逐至中山廬奴見翁須與歌舞等比  
五人同處媼與翁須共宿明日廼始留視翁須媼還求  
錢欲隨至邯鄲媼糶買未具廼始來歸曰翁須已去我  
無錢用隨也因絕至今不聞其問賈長兒妻貞及從者  
師遂辭往二十歲太子舍人侯明起從長安來求歌舞

者請翁須等五人長兒使遂送至長安皆入太子家及  
廣望三老更始劉仲卿妻其等四十五人辭皆驗宣奏  
王媼悼后母明白上皆召見賜無故武爵關內侯旬月  
間賞賜以鉅萬計頃之制詔御史賜外祖母號為博平  
君以博平蠡吾兩縣戶萬一千為湯沐邑封舅無故為  
平昌侯武為樂昌侯食邑各六千戶初廼始以本始四  
年病死後三歲家廼富貴追賜諡曰思成侯詔涿郡治  
冢室置園邑四百家長丞奉守如法歲餘博平君薨諡

曰昭成夫人詔徙思成侯合葬奉明顧成廟南置園邑  
長丞罷涿郡思成園王氏侯者二人無故子接為大司  
馬車騎將軍而武子商至丞相自有傳

孝宣許皇后元帝母也父廣漢昌邑人少時為昌邑王  
郎從武帝上甘泉誤取他郎鞍以被其馬發覺吏劾從  
行而盜當死有詔募下蠶室

若死罪囚欲就宮者聽之

後為宦者丞

上官桀謀反時廣漢部索其殿中廬有索長數尺可以  
縛人者數千枚滿一篋緘封廣漢索不得他吏往得之

廣漢坐論為鬼薪輸掖庭後為暴室賁夫時宣帝養於掖庭號皇曾孫與廣漢同寺居時掖庭令張賀本衛太子家吏及太子敗賀坐下刑以舊恩養視皇曾孫甚厚及曾孫壯大賀欲以女妻之是時昭帝始冠長八尺二寸賀弟安世為右將軍與霍將軍同心輔政間賀稱譽皇曾孫欲妻以女安世怒曰曾孫乃衛太子後也幸得以庶人衣食縣官足矣勿復言子女事賀廼止時許廣漢有女平君年十四五當為內者令歐侯氏子婦臨當



入歐侯氏子死其母將行卜相言當大貴母獨喜賀聞  
許嗇夫有女廼置酒請之酒酣為言曾孫體近下人乃  
關內侯可妻也廣漢許諾明日姬聞之怒廣漢重令為  
介遂與曾孫一歲生元帝數月曾孫立為帝平君為倢  
伃是時霍將軍有少女與皇太后有親公卿議更立皇  
后皆心儀霍將軍女亦未有言上乃詔求微時故劍大  
臣知指白立許倢伃為皇后既立霍光以后父廣漢刑  
人不宜君國歲餘乃封為昌成君霍光夫人顯欲貴其

小女道無從明年許皇后當娠病女醫淳于衍者霍氏所愛嘗入宮侍皇后疾衍夫賞為掖庭戶衛謂衍可過辭霍夫人行為我求安池監衍如言報顯顯因生心辟

左右字謂衍

稱衍字曰少夫

少夫幸報我以事我亦欲報少夫

可乎衍曰夫人所言何等不可者顯曰大將軍素愛小女成君欲奇貴之願以累少夫衍曰何謂邪顯曰婦人免乳大故十死一生今皇后當免身可因投毒藥去也成君即得為皇后矣如蒙力事成富貴與少夫共之衍

曰藥雜治當先嘗安可顯曰在少夫為之耳將軍領天下誰敢言者緩急相護但恐少夫無意耳衍良久曰願盡力即擣附子齋入長定宮皇后免身後衍取附子并合大醫大丸以飲皇后有頃曰我頭岑岑也藥得無有毒對曰無有遂加煩懣崩衍出過見顯相勞問亦未敢重謝衍後有人上書告諸醫侍疾無狀者皆收繫詔獄劾不道顯恐事急即以狀具語光因曰既失計為之無令吏急衍光驚愕默然不應其後奏上署衍勿論許后

立三年而崩諡曰恭哀皇后葬杜南是為杜陵南園後  
五年立皇太子廼封太子外祖父昌成君廣漢為平恩  
侯位特進後四年復封廣漢兩弟舜為博望侯延壽為  
樂成侯許氏侯者凡三人廣漢薨諡曰戴侯無子絕葬  
南園旁置邑三百家長丞奉守如法宣帝以延壽為大  
司馬車騎將軍輔政元帝即位復封延壽中子嘉為平  
恩侯亦為大司馬車騎將軍奉戴侯後

孝宣霍皇后大司馬大將軍博陸侯光女也母顯既使

淳于衍陰殺許后顯因為成君衣被治入宮具勸光內  
之果立為皇后初許后起微賤登至尊日淺從官車服  
甚節儉五日一朝皇太后於長樂宮親奉案上食以婦  
道共養及霍后立亦修許后故事而皇太后親霍后之  
姊子故常竦體敬而禮之皇后輿駕侍從甚盛賞賜官  
屬以千萬計與許后時縣絕矣上亦寵之頗房燕立三  
歲而光薨後一歲上立許后男為太子昌成君者為平  
恩侯顯怒恚不食歐血曰此乃民間時子安得立即后

有子反為王邪復教皇后令毒太子皇后數召太子賜食阿保輒先嘗之后挾毒不得行既而殺許后事頗泄顯遂與諸壻昆弟謀反發覺皆誅滅使有司賜皇后策廢處昭臺宮霍后立五年廢後十二年徙雲林館乃自殺葬昆吾亭東初霍光及兄驃騎將軍去病皆自以功伐封侯居位宣帝以光故封去病孫山山弟雲皆為列侯侯者前後四人

孝宣王皇后其先高祖時有功賜爵關內侯自沛徙長

陵傳爵至后父奉光奉光少時好鬪雞宣帝在民間數  
與奉光會相識奉光有女年十餘歲每當適人所當適  
輒死故久不行及宣帝即位召入後宮稍進為婕妤是  
時館陶主母華婕妤及淮陽憲王母張婕妤楚孝王母  
衛婕妤皆愛幸霍皇后廢後上憐許太子早失母幾為  
霍氏所害於是乃選後宮素謹慎而無子者遂立王婕  
妤為皇后令母養太子自為后後希見無寵封父奉光  
為邛成侯立十六年宣帝崩元帝即位為皇太后封太

后兄舜為安平侯後二年奉光覺謚曰共侯葬長門南  
置園邑二百家長丞奉守如法元帝崩成帝即位為太  
皇太后復爵太皇太后弟駿為關內侯食邑千戶王氏  
列侯二人關內侯一人舜子章章從弟咸皆至左右將  
軍時成帝母亦姓王氏故世號太皇太后為邛成太后  
邛成太后凡立四十九年年七十餘永始元年崩合葬  
杜陵稱東園奉光孫勲坐法免元始中成帝太后詔封  
共侯曾孫堅固為邛成侯至王莽乃絕



孝元王皇后王莽之姑也莽自謂黃帝之後其自本曰黃帝姓姚氏八世生虞舜舜起媯汭以媯為姓至周武王封舜後媯滿於陳是為胡公十三世生完完字敬仲奔齊齊桓公以為卿姓田氏十一世田和有齊國二世稱王至王建為秦所滅項羽起封建孫安為濟北王至漢興安失國齊人謂之王家因以為氏文景間安孫遂字伯紀處東平陵生賀字翁孺為武帝繡衣御史逐捕魏郡羣盜堅盧等黨與及吏畏懦追遯當坐者翁孺皆

縱不誅他部御史暴勝之等奏殺二千石誅千石以下  
及通行飲食坐連及者大部至斬萬餘人翁孺以奉使  
不稱免歎曰吾間活千人有封子孫吾所活者萬餘人  
後世其興乎翁孺既免而與東平陵終氏為怨廼徙魏  
郡元城委粟里為三老魏郡人德之元城建公曰昔春  
秋沙鹿崩晉史卜之曰陰為陽雄土火相乘故有沙鹿  
崩後六百四十五年宜有聖女興其齊田乎今王翁孺  
徙正直其地日月當之元城郭東有五鹿之虛即沙鹿

也後八十年當有貴女興天下云翁孺生禁字稚君少  
學法律長安為廷尉史本始三年生女政君即元后也  
禁有大志不修廉隅好酒色多取傍妻凡有四女八男  
長女君俠次即元后政君次君力次君弟長男鳳孝卿  
次曼元卿次譚子元崇少子商子夏立子叔根雉卿逢  
時季卿唯鳳崇與元后政君同母母適妻魏郡李氏女  
也後以妬去更嫁為河內苟賓妻初李親任政君在身  
夢月入其懷及壯大婉順得婦人道嘗許嫁未行所許

者死後東平王聘政君為姬未入王又薨禁獨怪之使卜數者相政君當大貴不可言禁心以為然乃教書學鼓琴五鳳中獻政君年十八矣入掖庭為家人子歲餘會皇太子所愛幸司馬良娣病且死謂太子曰妾死非天命乃諸娣妾良人更祝詛殺我太子憐之且以為然及司馬良娣死太子悲恚發病忽忽不樂因以過怒諸娣妾莫得進見者久之宣帝聞太子恨過諸娣妾欲順適其意迺令皇后擇後宮家人子可以虞侍太子者五

人政君與在其中及太子朝皇后廼見政君等五人微令旁長御問知太子所欲太子殊無意於五人者不得已於皇后彊應曰此中一人可是時政君坐近太子又獨衣絳緣諸于長御即以為是皇后使侍中杜輔掖庭令濁賢交送政君太子宮見丙殿得御幸有身先是者太子後宮娣妾以十數御幸久者七八年莫有子及王妃壹幸而有身甘露三年生成帝於甲館畫堂為世適皇孫宣帝愛之自名曰鷲字太孫常置左右後三年宣

帝崩太子即位是為孝元皇帝立太孫為皇太子以母  
王妃為倖封父禁為陽平侯後三日倖仔立為皇后  
禁位特進禁弟弘至長樂衛尉永光二年禁薨謚曰頃  
侯長子鳳嗣侯為衛尉侍中皇后自有子後希復進見  
太子壯大寬博恭慎其後幸酒樂燕樂元帝不以為能  
而傅昭儀有寵於上生定陶共王王多材藝上甚愛之  
常有意欲廢太子而立共王時鳳在位與皇后太子同  
心憂懼賴侍中史丹擁右太子語在丹傳上亦以皇后

素謹慎而太子先帝所常留意故得不廢元帝崩太子立是為孝成帝尊皇后為皇太后以鳳為大司馬大將軍領尚書事益封五千戶王氏之興自鳳始也又封太后同母弟崇為安成侯食邑萬戶鳳庶弟譚等皆賜爵關內侯食邑其夏黃霧四塞終日天子以問諫大夫楊興博士駟勝等對皆以為陰盛侵陽之氣也高祖之約也非功臣不侯今太后諸弟皆以無功為侯非高祖之約外戚未曾有也故天為見異言事者多以為然鳳懼

上書乞骸骨辭職上詔報勉令就位後五年諸吏散騎  
安成侯崇薨謚曰共侯有遺腹子奉世嗣侯太后哀之  
明年河平二年上悉封舅譚為平阿侯商成都侯立紅  
陽侯根曲陽侯逢時高平侯五侯同日封故世謂之五  
侯太后同產唯曼早卒餘畢侯矣太后母李親荀氏妻  
生一男名參寡居頃侯禁在時太后令禁還李親太后  
憐參欲以田蚡為比而封之上曰封田氏非正也以參  
為侍中水衡都尉王氏子弟皆卿大夫侍中諸曹分據



執官滿朝廷大將軍鳳用事上遂謙遜無所頗左右常  
薦光祿大夫劉向少子歆通達有異材上召見歆誦讀  
詩賦甚說之欲以為中常侍召取衣冠臨當拜左右皆  
曰未曉大將軍上曰此小事何須關大將軍左右叩頭  
爭之上於是語鳳鳳以為不可廼止其見憚如此上即  
位數年無繼嗣體常不平定陶共王來朝太后與上承  
先帝意遇之甚厚賞賜十倍於他王不以往事為纖介  
共王之來朝也天子留不遣歸國上謂共王我未有子

人命不諱一朝有他且不復相見爾長留侍我矣其後天子疾益有瘳共王於是留國邸旦夕侍上上甚見親重大將軍鳳心不便共王在京師會日蝕鳳因言日蝕陰盛之象為非常異定陶王雖親於禮當奉藩在國今留侍京師詭正非常故天見戒宜遣歸國上不得已於鳳而許之共王辭去上與相對涕泣而訣京兆尹王章素剛直敢言以為鳳建遣共王之國非是乃奏封事言災異之發為大臣顓政者也今聞大將軍猥歸日蝕之

咎於定陶王建遣之國苟欲使天子孤立於上顓擅朝  
權以便其私非忠臣也且日食陰侵陽臣顓君之咎今  
政事無大小皆自鳳出天子曾不壹舉手鳳不內省自  
責反歸咎善人推遠定陶王且鳳誣罔不忠非一事也  
前丞相樂昌侯王商本以先帝外屬內行篤有威重位  
歷將相國家柱石臣也其人守正不肯詘節隨鳳委曲  
卒用閹門之事為鳳所罷身以憂死衆庶愍之又鳳知  
其小婦弟張美人已嘗適人於禮不宜配至尊託以為

宜子內之後宮苟以私其妻弟間張美人未嘗任身就館也且羌胡尚殺首子以盪腸正世況於天子而近已出之女也此三者皆大事陛下所自見足以知其餘及他所不見者鳳不可久典事宜退使就第選忠賢以代之自鳳之白罷商後遣定陶王也上不能平及聞章言天子感悟納之謂章曰微京兆直言吾不聞社稷計且惟賢知賢君試為朕求可以自輔者於是章奏封事薦中山孝王舅琅邪太守馮野王忠信質直知謀有餘宜

筦朝政上自為太子時數間野王先帝名卿聲譽出鳳  
遠甚方欲倚以代鳳初章每召見上輒辟左右時鳳從  
弟長樂衛尉弘子侍中音獨側聽具知章言以語鳳鳳  
因稱病出就第上疏乞骸骨辭旨甚哀太后為之垂涕  
不御食上少而親鳳弗忍廢廼報鳳令起視事上使尚  
書劾奏章知野王前以王舅出補吏而私薦之欲令在  
朝阿附諸侯又知張美人體御至尊而妄稱引羌胡殺  
子盪腸非所宜言遂下章更廷尉致其大逆罪以為比

上夷狄欲絕繼嗣之端背畔天子私為定陶王章死獄中妻子徙合浦自是公卿見鳳側目而視郡國守相刺史皆出其門又以侍中太僕音為御史大夫列於三公而五侯羣弟爭為奢侈賂遺珍寶四面而至後庭姬妾各數十人僮奴以千百數羅鐘磬舞鄭女作倡優狗馬馳逐大治第室起土山漸臺洞門高廊閣道連屬彌望百姓歌之曰五侯初起曲陽最怒壞決高都連竟外杜土山漸臺西象白虎其奢僭如此然皆通敏人事好士

養賢傾財施予以相高尚鳳輔政凡十一年陽朔三年  
秋鳳病天子數自臨問親執其手涕泣曰將軍病如有  
不可言平阿侯譚次將軍矣鳳頓首泣曰譚等雖與臣  
至親行皆奢僭無以率導百姓不如御史大夫音謹勅  
臣敢以死保之及鳳且死上疏謝上復固薦音自代言  
譚等五人必不可用天子然之初譚倨不肯事鳳而音  
敬奉卑恭如子故薦之鳳薨天子臨弔贈寵送以輕車  
介士軍陳自長安至渭陵謚曰敬成侯子襄嗣侯為衛

尉御史大夫音竟代鳳為大司馬車騎將軍而平阿侯  
譚位特進領城門兵谷永說譚令讓不受城門職由是  
與音不平語在永傳音既以從舅越親用事小心親職  
歲餘詔封音為安陽侯食邑與五侯等俱三千戶初成  
都侯商嘗病欲避暑從上借明光宮後又穿長安城引  
內澧水注第中大陂以行船立羽蓋張周帷輯濯越歌  
上幸商第見穿城引水意恨內衙之未言後微行出過  
曲陽侯第又見園中土山漸臺似類白虎殿於是上怒



以讓車騎將軍音商根兄弟欲自黥劓謝太后上聞之大怒廼使尚書責問司隸校尉京兆尹知成都侯商擅穿帝城決引澧水曲陽侯根驕奢僭上赤墀青瑣紅陽侯立父子臧匿狂猾亡命賓客為羣盜司隸京兆皆阿縱不舉奏正法二人頓首省戶下又賜車騎將軍音策書曰外家何甘樂禍敗而欲自黥劓相戮辱於太后前傷慈母之心以危亂國外家宗族彊上一身寢弱日久今將一施之君其召諸侯令待府舍是日詔尚書奏文

帝時誅將軍薄昭故事車騎將軍音藉橐請罪商立根  
皆負斧質謝上不忍誅然後得已久之平阿侯譚薨謚  
曰安侯子仁嗣侯太后憐弟曼早死獨不得封寡婦渠  
供養東宮曼子莽幼孤不及等比常以為語平阿侯譚  
成都侯商及在位多稱莽者久之上復下詔追封曼為  
新都哀侯而子莽嗣爵為新都侯後又封太后姊子淳  
于長為定陵侯王氏親屬侯者十人上悔廢平阿侯譚  
不輔政而薨也廼復進成都侯商以特進領城門兵置

幕府得舉吏如將軍王氏爵位日盛惟音為修整數諫  
正有忠節輔政八年薨弔贈如大將軍謚曰敬侯子舜  
嗣侯為太僕侍中特進成都侯商代音為大司馬衛將  
軍而紅陽侯立位特進領城門兵商輔政四歲病乞骸  
骨天子閔之更以為大將軍益封二千戶商薨弔贈如  
大將軍故事謚曰景成侯子況嗣侯紅陽侯立次當輔  
政有罪過上乃廢立而用光祿勳曲陽侯根為大司馬  
驃騎將軍歲餘益封千七百戶高平侯逢時無材能名

稱是歲薨謚曰戴侯子買之嗣侯綏和元年上即位二十餘年無繼嗣而定陶共王已薨子嗣立為王王祖母傳太后重賂遺根為王求漢嗣根為言上亦欲立之遂徵定陶王為太子時根輔政五歲矣乞骸骨上乃益封根五千戶賜安車駟馬黃金五百斤罷就第先是定陵侯淳于長以外屬能謀議為衛尉侍中在輔政之次是歲新都侯莽告長伏罪與紅陽侯立相連長下獄死立就國語在長傳故曲陽侯根薦莽以自代亦以為莽有

忠直節上遂擢莽從侍中騎都尉光祿大夫為大司馬  
歲餘成帝崩哀帝即位太后詔莽就第避帝外家哀帝  
初優莽不聽莽上書固乞骸骨而退上乃下詔益封根  
二千戶舜五百戶莽三百五十戶以莽為特進朝朔望  
又還紅陽侯立京師哀帝少而聞知王氏驕盛心不能  
喜以初立故優之後月餘司隸校尉鮮光奏曲陽侯根  
宗重身尊三世據權五將秉政天下輻湊自效根行貪  
邪臧累鉅萬縱橫恣意大治室第第中起土山立兩市

殿上赤墀戶青瑣游觀射獵使奴從者被甲持弓弩陳  
為步兵止宿離宮水衡共張發民治道百姓苦之推親  
近吏主簿張業以為尚書蔽上壅下壞亂制度先帝棄  
天下根不悲哀思慕山陵未成公聘取故掖庭女樂五  
官殷嚴王飛君等置酒歌舞捐忘先帝厚恩及根兄子  
成都侯況亦聘故掖庭貴人為妻皆無人臣禮大不敬  
不道於是天子遣根就國免況為庶人歸故郡根及況  
父商所薦舉為官者皆罷後二歲傅太后帝母丁姬皆

稱尊號有司奏新都侯莽前為大司馬貶抑尊號之儀  
虧損孝道及平阿侯仁臧匿趙昭儀親屬皆就國天下  
多寃王氏諫大夫楊宣上書言太皇太后春秋七十數  
更憂傷勅令親屬引領以避丁傳甚非先帝託陛下奉  
承東宮之意帝感其言復封商中子邑為成都侯元壽  
元年日蝕賢良對策多訟新都侯莽者上於是徵莽及  
平阿侯仁還京師侍太后曲陽侯根薨國除明年哀帝  
崩無子太皇太后以莽為大司馬與共徵立中山王奉

哀帝後是為平帝平帝九歲常年被疾太后臨朝委政於莽莽頗威福紅陽侯立莽諸父平阿侯仁素剛直莽內憚之令大臣以罪過奏遣立仁就國莽日誑耀太后言輔政致太平羣臣奏請尊莽為安漢公後遂遣使者迫守立仁令自殺賜立諡曰荒侯子柱嗣仁諡曰刺侯子術嗣是歲元始三年也明年莽風羣臣奏立莽女為皇后又奏尊莽為宰衡莽既外壹羣臣令稱已功德又內媚事旁側長御以下賂遺以千萬數白尊太后姊妹



君俠為廣恩君君力為廣惠君君弟為廣施君皆食湯沐邑日夜共譽莽莽又知太后婦人厭居深宮中莽欲虞樂以市其權乃令太后四時車駕巡狩四郊存見孤寡貞婦春幸繭館率皇后列侯夫人桑遵霸水而被除夏遊御宿鄠杜之間秋歷東館望昆明集黃山宮冬饗飲飛羽殿名校獵上蘭登長平館臨涇水而覽焉繭宿苑在長安城南黃山宮在槐里飛羽殿在未央宮上蘭觀名在上林中太后所至屬縣輒施恩惠賜民錢帛牛酒歲以為常太后從容言曰我始入太

子家時見於丙殿至今五六十歲尚頗識之莽遂導太后幸太子宮甚說太后旁弄兒病在外舍莽自親候之其欲得太后意如此平帝崩無子莽徵宣帝玄孫選最少者廣戚侯子劉嬰年二歲託以卜相為最吉乃風公卿奏請立嬰為孺子令宰衡安漢公莽踐阼居攝如周公傳成王故事太后不以為可力不能禁於是莽遂為攝皇帝改元稱制焉俄而宗室安衆侯劉崇及東郡太守翟義等惡之更舉兵欲誅莽太后聞之曰人心不相

遠也我雖婦人亦知莽必以是自危不可其後莽遂以  
符命自立為真皇帝先奉諸符瑞以白太后太后大驚  
初漢高祖入咸陽至霸上秦王子嬰降於軹道奉上始  
皇璽及高祖誅項籍即天子位因御服其璽世世傳受  
號曰漢傳國璽以孺子未立璽藏長樂宮及莽即位請  
璽太后不肯授莽莽使安陽侯舜諭指舜素謹勅太后  
雅愛信之舜既見太后知其為莽求璽怒罵之曰而屬  
父子宗族蒙漢家力富貴累世既無以報受人孤寄乘

便利時奪取其國不復顧恩義人如此者狗猪不食其  
餘天下豈有而兄弟邪且若自以金匱符命為新皇帝  
變更正朔服制亦當自更作璽傳之萬世何以用此亡  
國不祥璽為而欲求之我漢家老寡婦旦暮且死欲與  
此璽俱葬終不可得太后因涕泣而言旁側長御以下  
皆垂涕舜亦悲不能自止良久乃仰謂太后臣等已無  
可言者莽必欲得傳國璽太后寧能終不與邪太后聞  
舜語切恐莽欲脅之廼出漢傳國璽投之地以授舜曰

我老已死如而兄弟令族滅也舜既得傳國璽奏之莽  
大說迺為太后置酒未央宮漸臺大縱衆樂莽又欲改  
太后漢家舊號恐不見聽而莽疎屬王諫欲諂莽上書  
言太皇太后不宜稱尊號當隨漢廢於是莽親以其書  
白太后太后曰此言是也莽因曰此諄德之臣也罪當  
誅時冠軍張永遂獻符命銅璽有新室文母太皇太后  
之文迺上言太皇太后宜更命為新室文母太皇太后  
莽遂下詔以璽文視羣公親率王侯卿士奉上皇太后

璽綬太后聽許莽於是鴆殺王諫而封張永為貢符子  
初莽諂太后奏尊元帝廟為高宗太后晏駕後當以禮  
配食及是改號故絕之於漢不令得體元帝墮壞孝元  
廟更為文母太后起廟獨置孝元廟故殿以為文母簪  
食堂既成名曰長壽宮以太后在故未謂之廟莽以太  
后好出游觀迺車駕置酒長壽宮請太后既至見孝元  
廟廢撤塗地太后驚泣曰此漢家宗廟皆有神靈與何  
治而壞之且使鬼神無知又何用廟為如今有知我迺

人之妃妾豈宜辱帝之堂以陳饋食哉私謂左右曰此人嫚神多矣能得久祐乎飲酒不樂而罷自莽篡位後知太后怨恨求所以媚太后者無所不為然愈不說莽更漢家黑貂著黃貂又改漢正朔伏臘日太后令其官屬黑貂至漢家正臘日獨與其左右相對飲酒食太后年八十四建國五年二月癸丑崩合葬渭陵莽詔大夫揚雄作誄曰太陰之精沙鹿之靈作合於漢配元生成著其協於元城沙鹿太陰精者謂夢月也王氏當成帝

之世十侯五大司馬外戚之盛自漢以來莫及焉太后崩後十年為地皇三年漢兵起明年三輔豪桀誅莽初紅陽侯立就國南陽與諸劉結恩立少子丹為中山太守世祖初起時丹降為將軍戰死世祖閔之封丹子泓為武桓侯傳爵於後司徒掾班彪曰自三代以來春秋所記王公國君與其失世稀不以女寵漢興后妃之家呂霍上官幾危國者數矣及王莽之興由孝元后歷漢四世為天下母饗國六十餘載羣弟世權更持國柄五



將十侯卒成新都位號已移於天下而元后卷卷猶握一璽不欲以授莽婦人之仁悲夫

孝成許皇后大司馬車騎將軍平恩侯嘉女也元帝悼傷母恭哀皇后居位日淺而遭霍氏之禍故選嘉女以配皇太子初入太子家上令中常侍黃門親迎者侍送還白太子懽悅狀元帝喜謂左右酌酒賀我左右皆稱萬歲久之有一男失之及成帝即位立許妃為皇后復生一女又失之初后父嘉自元帝時為大司馬車騎將

軍輔政已八九年矣及成帝立復以元舅陽平侯王鳳為大司馬大將軍與嘉並杜欽以為故事后父重於帝舅乃說鳳曰車騎將軍至貴將軍宜尊之敬之無失其意蓋輕細微眇之漸必生乖忤之患不可不慎衛將軍之日盛於蓋侯近世之事語在長老耳中唯將軍察焉久之上欲專委任鳳廼策嘉曰將軍家重身尊不宜以吏職自系賜黃金二百斤以特進侯就朝位後歲餘薨諡曰恭侯后聰慧善史書自為妃至即位常寵於上後

宮希得進見皇太后及帝諸舅憂上無繼嗣時又數有  
灾異劉向谷永皆陳其咎在於後宮上然其言於是省  
減椒房掖庭用度皇后素驕貴意不能平乃上疏言頃  
者大長秋受詔椒房儀法御服輿駕所發宮署及所造  
作遺賜外家羣臣妾皆如竟寧以前故事竟寧元  
帝時也妾自  
念入椒房以來凡車輿服御及遺賜外家未嘗有所踰  
越每輒決上可覆問也自餘宮中小有發取於詛未害  
而家吏動相約制繩以詔書使妾不得揺手柰何妾薄

命端遇竟寧前書奏上於是採劉向谷永所言以報大  
要誠其謙約焉而后終以為恨是時大將軍鳳用事威  
權尤盛其後比三年日蝕言事者頗歸咎於鳳矣而谷  
永等遂著之許氏許氏自知為鳳所不佑久之皇后寵  
亦益衰而後宮多新嬖后姊平安剛侯夫人謁等為媚  
道祝諱後宮有身者王美人及鳳等事發覺太后大怒  
下吏考問謁等誅死后坐廢處昭臺宮親屬皆歸故郡  
山陽后弟子平恩侯旦就國后立十四年而廢在昭臺

歲餘還徙長定宮後九年上憐許氏詔還平恩侯且及親屬在山陽郡者是歲廢后敗先是廢后姊嬀寡居與定陵侯淳于長私通因為之小妻長給之曰我能白東宮復立許皇后為左皇后廢后因嬀私賂遺長數通書記相報謝長書有諄謾發覺天子使廷尉孔光持節賜廢后藥自殺葬延陵交道廐西

孝成班婕妤帝初即位選入後宮始為少使蛾而大幸為婕妤居增成舍再就館有男數月失之成帝游於後

庭嘗欲與倬仔同輦倬仔辭曰觀古圖畫聖賢之君皆有名臣在側三代末主乃有嬖女今欲同輦得無近似之乎上善其言而止太后聞之喜曰古有樊姬今有班倬仔倬仔誦詩及窈窕德象女師之篇每進見上疏依則古禮自鴻嘉後上稍隆於內寵倬仔進侍者李平平得幸立為倬仔上曰始衛皇后亦從微起乃賜平姓曰衛所謂衛倬仔也其後趙飛燕姊弟亦從自微賤興踰越禮制寢盛於前班倬仔及許皇后皆失寵稀復進見

鴻嘉三年趙飛燕譖告許皇后班婕妤挾媚道祝詛後  
宮詈及主上許后坐廢考問班婕妤對曰妾聞死  
生有命富貴在天修正尚未蒙福為邪欲以何望假使  
鬼神有知不受不臣之愬如其無知愬之何益故不為  
也上善其對而閔之賜黃金百斤趙氏姊弟驕妬婕妤  
恐久見危遂求共養太后於長信宮上許焉婕妤退處  
東宮作賦以自傷悼其辭曰承祖考之遺德兮何性命  
之淑靈登薄軀於宮闕兮充下陳於後庭蒙聖皇之渥

惠兮當日月之盛明揚先烈之翕赫兮奉隆寵於增成  
既過幸於非位兮竊庶幾乎嘉時每寤寐而系息兮申  
佩離以自思陳女圖以鏡監兮顧女史而問詩悲晨婦  
之作戒兮哀褒閭之為郵美皇英之女虞兮榮任姒之  
母周雖愚陋其靡及兮敢舍心而忘茲歷年歲而悼懼  
兮閔蕃華之不滋痛陽祿與柘館兮仍襁褓而離災豈  
妾人之殃咎兮將天命之不可求白日忽已移光兮遂  
晻莫而昧幽猶被覆載之厚德兮不廢捐於罪郵奉共



養于東宮兮託長信之末流共洒掃於帷幄兮永終死  
以為期願歸骨於山足兮依松栢之餘休重曰潛元宮  
兮幽以清應門閉兮禁闥扃華殿塵兮玉階落中庭萋  
兮綠草生廣室陰兮帷幄暗房櫳虛兮風泠泠感帷裳  
兮發紅羅紛綵繒兮紈素聲神眇眇兮密覲處君不御  
兮誰為榮俯視兮丹墀思君兮履綦仰視兮雲屋雙涕  
兮橫流顧左右兮和顏酌羽觴兮銷憂惟人生兮一世  
忽一過兮若浮已獨享兮高明處生民兮極休勉虞精

兮極樂與福祿兮無期綠衣兮白華自古兮有之至成  
帝崩僖仔充奉園陵薨因葬園中

孝成趙皇后本長安宮人

本宮人以賜陽阿主家也宮人者省中侍使宮婢名曰宮

人非天子掖庭中也事見漢舊儀言長安者以別甘泉等諸宮省也初生時父母不舉二

日不死乃收養之及壯屬陽阿主家學歌舞號曰飛燕  
成帝嘗微行過陽阿主家作樂上見飛燕而說之召入  
宮大幸有女弟復召入俱為僖仔貴傾後宮許后之廢  
也上欲立趙僖仔為皇后嫌其所出微甚難之太后姊

子淳于長為侍中數往來傳語得太后指上立封趙婕  
妤父臨為成陽侯後月餘乃立婕妤為皇后追以長前  
白罷昌陵功封為定陵侯皇后既立寵少衰而弟絕幸

為昭儀居昭陽舍其中庭彤朱而殿上髹漆

髹許求反一再漆也

切皆銅沓冒黃金塗

切干結切門限也沓冒其頭也塗以金塗銅上也沓他合反

白

玉階壁帶往往為黃金缸函藍田璧明珠翠羽飾之

壁帶

壁之橫木露出如帶壁帶之中以金為缸若車缸之形缸中著珠璧翠羽缸音工

自後宮未嘗

有焉姊弟專寵十年餘卒皆無子末年定陶王來朝王

祖母傅太后私賂遺趙皇后昭儀遂立定陶王為太子  
明年春成帝崩帝素彊無疾病是時楚思王衍梁王立  
來朝明旦當辭去上宿供帳白虎殿又欲拜左將軍孔  
光為丞相已刻侯印書贊昏夜平善鄉晨傳綉轡欲起  
因失衣不能言晝漏上十刻而崩民間歸罪趙昭儀皇  
太后詔大司馬莽曰皇帝暴崩羣衆譴譁怪之掖庭令  
輔等在後庭左右侍燕逼近雜與御史丞相廷尉治問  
皇帝起居發病狀趙昭儀自殺哀帝既立尊趙皇后為

皇太后封太后弟侍中駙馬都尉欽為新成侯趙氏侯者二人後數月司隸解光奏言臣聞許美人及故中宮史曹官皆御幸孝成皇帝產子子隱不見臣遣從事掾業史望驗問知狀者掖庭獄丞籍武故中黃門王舜吳恭靳嚴官婢曹曉道房張棄故趙昭儀御者子客子王偏臧兼等皆曰宮即曉子女前屬中宮為學事史通詩授皇后房與宮對食元延元年中宮語房曰陛下幸宮後數月曉入殿中見宮腹大問宮宮曰御幸有身其十

月中宮乳掖庭牛官令舍有婢六人中黃門田客持詔  
記盛綠綈方底封御史中丞印予武曰取牛官令舍婦  
人新產兒婢六人盡置暴室獄母問兒男女誰兒也武  
迎置獄宮曰善藏我兒胞丞知是何等兒也後三日客  
持詔記與武問兒死未手書對牘背武即書對兒見在  
未死有頃客出曰上與昭儀大怒柰何不殺武叩頭啼  
曰不殺兒自知當死殺之亦死即因客奏封事曰陛下  
未有繼嗣子無貴賤唯留意奏入客復持詔記予武曰

今夜漏上五刻持兒與舜會東交掖門武因問客陛下  
得武書意何如曰慳也武以兒付舜舜受詔內兒殿中  
為擇乳母告善養兒且有賞母令漏泄舜擇棄為乳母  
時兒生八九日後三日客復持詔記封如前予武中有  
封小綠篋記曰告武以篋中物書予獄中婦人武自臨  
飲之武發篋中有裹藥二枚赫蹏書曰告偉能努力飲  
此藥不可復入女自知之偉能即宮宮讀書已曰果也  
欲姊弟擅天下我兒男也額上有壯髮類孝元皇帝今

兒安在危殺之矣奈何令長信聞之宮飲藥死後宮婢  
六人召入出語武曰昭儀言女無過寧自殺邪若外家  
也我曹言願自殺即自繆死武皆表奏狀棄所養兒十  
一日宮長李南以詔書取兒去不知所置許美人前在  
上林涿沐館數召入飾室中若舍一歲再三召留數月  
或半歲御幸元延二年懷子其十一月乳詔使嚴持乳  
醫及五種和藥丸三送美人所後客子偏兼間昭儀謂  
成帝曰常給我言從中宮來即從中宮來許美人兒何



從生中許氏竟當復立邪慙以手自擣以頭擊壁戶柱  
從牀上自投地啼泣不肯食曰今當安置我欲歸耳帝  
曰今故告之反怒為殊不可曉也帝亦不食昭儀曰陛下  
下自知是不食為何陛下常自言不負女今美人有子  
竟負約謂何帝曰約以趙氏故不立許氏使天下無出  
趙氏上者母憂也後詔使嚴持綠囊書予許美人告嚴  
曰美人當有以予女受來置飾室中簾南美人以葦篋  
一合盛所生兒緘封及綠囊報書予嚴嚴持篋書置飾

室簾南去帝與昭儀坐使客子解篋緘未已帝使客子  
偏兼皆出自閉戶獨與昭儀坐須臾開戶呼客子偏兼  
使緘封篋及綠綈方底推置屏風東恭受詔持篋方底  
予武皆封以御史中丞印曰告武篋中有死兒埋屏處  
勿令人知武穿獄樓垣下為坎埋其中故長定許貴人  
及故成都平阿侯家婢王業任嬖公孫習前免為庶人  
詔召入屬昭儀為私婢成帝崩未幸梓宮倉卒悲哀之  
時昭儀自知罪惡大知業等故許氏王氏婢恐事泄而

以大婢羊子等賜予業等各且十人以慰其意屬無道  
我家過失元延二年五月故掖庭令吾邱遵謂武曰掖  
庭丞吏以下皆與昭儀合通無可與語者獨欲與武有  
所言我無子武有子是家輕族人得無不敢乎掖庭中  
御幸生子者輒死又飲藥傷墮者無數欲與武共言之  
大臣驃騎將軍貪者錢不足計事奈何令長信得聞之  
遵後病困謂武令我已死前所語事武不能獨為也慎  
語臣謹案趙昭儀傾亂聖朝親滅繼嗣當伏族誅令同

產親屬尚在尊貴之位逼近帷幄非所以懲惡崇誼示  
四方也請事窮竟丞相以下議正法哀帝於是免新成  
侯趙欽及欽兄子成陽侯訢皆為庶人將家屬遠徙遼  
西郡時議郎耿育上疏言不宜暴露先帝私燕流傳後  
世遠聞百蠻近布海內甚非先帝託後之意也先是哀  
帝為太子亦頗得趙太后力遂不窮竟其事傳太后德  
趙太后趙太后亦歸心焉故成帝母及王氏皆怨之及  
哀帝崩王莽乃白太后詔有司曰前皇太后與弟昭儀

俱侍帷幄姊弟專寵殘滅繼嗣以危宗廟悖天犯祖無  
為天下母之義貶皇太后為孝成皇后徙居北宮後月  
餘復有詔廢為庶人令就其園是日自殺凡立十六年  
而誅先是有童謠曰燕燕尾涎涎張公子時相見木門  
倉琅根燕飛來啄皇孫皇孫死燕啄矢成帝每微行常  
與張放俱而稱富平侯家故曰張公子倉琅根宮門銅  
鏐也

孝元傳昭儀哀帝祖母也父河內溫人蚤卒母更嫁為

魏郡鄭翁妻生男憚昭儀少為上官太后才人自元帝為太子得進幸元帝即位立為婕妤甚有寵為人有才畧善事人下至宮人左右飲酒酹地皆祝延之產一男一女女為平都公主男為定陶恭王王有才藝尤愛於上元帝既重傳昭儀及馮婕妤亦幸生中山孝王上欲殊之於後宮以二人皆有子為王上尚在未得稱太后乃更號曰昭儀賜以印綬在婕妤上昭其儀尊之也至成哀時趙昭儀董昭儀皆無子猶稱焉元帝崩傳昭儀

隨王歸國稱定陶太后後十年恭王薨子代為王王母  
曰丁姬傳太后躬自養視既壯大成帝無繼嗣時中山  
孝王在元延四年中山孝王及定陶王皆入朝傳太后  
多以珍寶賂遺趙昭儀及帝舅驃騎將軍王根陰為王  
求漢嗣皆見上無子欲豫自結為久長計更稱譽定陶  
王上亦自器之明年遂徵定陶王立為太子月餘天子  
立楚孝王孫景為定陶王奉恭王後詔傳太后與太子  
母丁姬自居定陶國邸頃之成帝母王太后以太子小

而傳太后抱養之令十日一至太子家丁姬以不養太子獨不得成帝崩哀帝即位王太后詔令傳太后丁姬十日一至未央宮高昌侯董宏希指上書言宜立丁姬為帝太后師丹劾奏宏懷邪誤朝不道上初即位謙讓從師丹言止後廼白令王太后下詔尊定陶恭王為恭皇哀帝因是曰春秋母以子貴尊傳太后為恭皇太后丁姬為恭皇后各置左右詹事食邑如長信宮中宮追尊恭皇太后父為崇祖侯恭皇后父為褒德侯後歲餘



遂下詔曰漢家之制推親親以顯尊尊定陶恭皇之號  
不宜復稱定陶其尊恭皇太后為帝太太后丁后為帝  
太后後又更號帝太太后為皇太太后稱永信宮帝太  
后稱中安宮而成帝母太皇太后本稱長信宮成帝趙  
后為皇太后並四太后各置少府太僕秩皆中二千石  
為恭皇立寢廟於京師比宣帝父悼皇考制度序昭穆  
於前殿傳太后父同產弟四人曰子孟中叔子元幼君  
子孟子喜至大司馬封高武侯中叔子晏亦大司馬封

孔鄉侯幼君子商封汝昌侯為太后父崇祖侯後更號  
崇祖曰汝昌哀侯太后同母弟鄭惲前死以惲子業為  
陽信侯追尊惲為陽信節侯鄭氏傅氏侯者凡六人大  
司馬二人九卿二千石六人侍中諸曹十餘人傅太后  
既尊後尤驕與成帝母語至謂之姬與中山孝王母馮  
太后並事元帝追怨之陷以祝詛令自殺元壽元年崩  
合葬渭陵稱孝元傳皇后云

定陶丁姬哀帝母也易祖師丁將軍之元孫家在山陽

瑕邱父至廬江太守始定陶恭王先為山陽王而丁氏  
內其女為姬王后張氏無子唯丁姬河平四年生哀帝  
丁姬為帝太后兩兄忠明明以帝舅封陽安侯忠早卒  
封其子滿為平周侯太后叔父憲望望為左將軍憲為  
太僕明為大司馬驃騎將軍輔政丁氏侯者凡二人太  
司馬一人將軍九卿二千石六人侍中諸曹亦十餘人  
丁傳以一二年間暴興尤盛建平二年丁太后崩哀帝  
詔起陵恭皇之園遣大司馬驃騎將軍明東送葬于定

陶貴震山東哀帝崩王莽秉政使有司舉奏丁傳罪惡  
莽以太皇太后詔皆免官爵丁氏徙歸故郡莽奏貶傳  
太后號為定陶恭王母丁太后號曰丁姬元始五年莽  
復言恭王母丁姬前懷帝太后皇太太后璽綬以葬不  
應禮請發恭王母及丁姬冢取其璽綬消滅徙恭王母  
歸定陶葬恭王冢次而葬丁姬復其故太后以為既已  
之事不須復發莽固爭之太后詔曰因故棺為致惇作  
冢祠以太牢謁者護既發傳太后冢崩壓殺數百人開

丁姬椁戶火出炎四五丈吏卒以水沃滅乃得入燒燔  
槨中器物恭復奏言共王母及丁姬棺皆名梓宮及有  
珠玉之服請更以木棺代去珠玉衣奏可既開傳太后  
棺臭聞數里公卿在位皆阿恭指入錢帛遣子弟及諸  
生四夷十餘萬人操持作具助將作掘平恭王母丁姬  
故冢二旬間皆平恭又周棘其處以為世戒時有羣燕  
數千銜土投丁姬穿中丁傳既敗孔鄉侯晏將家屬徙  
合浦宗族皆歸故郡唯高武侯喜得全自有傳

孝哀傳皇后定陶太后從弟子也哀帝為定陶王時傳太后欲重親取以配王王入為漢太子傳氏女為妃哀帝即位成帝大行尚在前殿而傳太后封傳妃父晏為孔鄉侯與帝舅陽安侯丁明同日俱封時師丹諫以為天下自王者所有親戚何患不富貴而倉卒若是其不長久矣晏封後月餘傳妃立為皇后傳氏既盛晏最尊重哀帝崩王莽白太皇太后下詔曰定陶共王太后與孔鄉侯晏同心合謀背恩忘本專恣不軌與至尊同稱

號終沒至廼配食於左坐諄逆無道今令孝哀皇后退處桂宮後月餘復與孝成趙皇后俱廢為庶人就其園自殺

孝元馮昭儀平帝祖母也元帝即位二年以選入後宮時父奉世為執金吾昭儀始為長使數月至美人後五年就館生男拜倖時父奉世為右將軍光祿勳奉世長男野王為左馮翊父子並居朝廷議者以為器能當其位非用女寵故也而馮倖內寵與傅昭儀等建昭

中上幸虎園鬪獸後宮皆坐熊佚出園攀檻欲上殿左右貴人傳昭儀等皆驚走馮婕妤直前當熊而立左右格殺熊上問人情驚懼何故前當熊婕妤對曰猛獸得人則止妾恐熊至御座故以身當之元帝嗟歎以此倍加禮重傳昭儀等皆慙明年夏馮婕妤男立為信都王尊婕妤為昭儀元帝崩為信都太后與王俱居儲元宮河平中隨王之國後徙中山是為孝王後徵定陶王為太子封中山王舅參為宜鄉侯參馮太后少弟也是歲



孝王薨有一男嗣為王時未滿歲有眚病太后自養視數禱祠鮮哀帝即位遣中郎謁者張由將醫治中山小王由素有狂易病病發怒去西歸長安尚書簿責擅去狀由恐因誣言中山太后祝詛上及太后太后即傳昭儀也素常怨馮太后因是遣御史丁元案驗盡收御者官吏凡馮氏昆弟在國者百餘人分繫洛陽魏郡鉅鹿數十日無所得更使中謁者令史立與丞相長史大鴻臚丞雜治立受傳太后指幾得封侯治馮太后女弟習

及寡弟婦君之死者數十人巫劉吾服祝詛醫徐遂成  
言習君之曰武帝時醫修氏刺治武帝得二十萬耳今  
愈上不得封侯不如殺上令中山王代可得封立等劾  
奏祝詛謀反大逆責問馮太后無服辭立曰熊之上殿  
何其勇令何怯也太后還謂左右曰此乃中語前世事  
吏何用知之是欲陷殺我也乃飲藥自殺先未死有司  
請誅之上不忍致法廢為庶人徙雲陽宮既死有司復  
奏太后死在未廢前有詔以諸侯王太后儀葬之宜鄉

侯參君之習夫及子當相坐者或自殺或伏法參女并為孝王后有兩女有司奏免為庶人與馮氏宗族徙歸故郡張由以先告賜爵關內侯史立遷中太僕哀帝崩大司徒孔光奏由前誣告骨肉立陷人入大辟為國家結怨於天下以取秩遷獲爵邑幸蒙赦令請免為庶人徙合浦云

中山衛姬平帝母也父子豪中山盧奴人官至衛尉子豪女弟為宣帝婕妤生楚孝王長女又為元帝婕妤生

平陽公主成帝時中山孝王無子上以衛氏吉祥以子  
豪少女配孝王元延四年生平帝平帝年二歲孝王薨  
代為王哀帝崩無嗣太皇太后與王莽迎中山王立為  
帝莽欲顓國權懲丁傳行事以帝為成帝後母衛姬及  
外家不當得至京師乃更立宗室桃鄉侯子成都為中  
山王奉孝王後遣少傅左將軍甄豐賜衛姬璽綬即拜  
為中山孝王后以苦陘縣為湯沐邑又賜帝舅衛寶寶  
弟元爵關內侯賜帝三妹皆為封君食邑各二千戶莽

長子宇非莽隔絕衛氏恐久後受禍即私與衛寶通書  
記教衛后上書謝恩因陳丁傳舊惡幾得至京師莽白  
太皇太后下詔褒稱之復以中山故安戶七千益中山  
后湯沐邑加賜及中山王黃金各百斤增傳相以下秩  
衛后日夜啼泣思見帝而但益戶邑宇復教令上書求  
至京師會事發覺莽殺宇盡誅衛氏支屬衛寶女為中  
山王后免后徙合浦唯衛太后在王莽篡國廢為家人  
後歲餘卒葬孝王旁

孝平王皇后安漢公太傅大司馬莽女也平帝即位年九歲成帝母太皇太后稱制而莽秉政莽欲依霍光故事以女配帝太后意不欲也莽設變詐令女必入因以自重太后不得已而許之詔遣納采用太牢祠宗廟明年春遣三公以下奉乘輿法駕迎皇后於安漢公第宮入未央宮前殿羣臣就位行禮大赦天下並封父安漢公地滿百里諸迎皇后及行禮者皆增秩賜金帛有差皇后立三月以禮見高廟尊父安漢公號曰宰衡位在

諸侯王上賜公夫人號曰功顯君食邑封公子安為襄  
新侯臨為賞都侯后立歲餘平帝崩莽立孝宣元孫嬰  
為孺子莽攝帝位尊皇后為皇太后三年莽即真以嬰  
為定安公改皇太后號為定安公太后時年十八為人  
婉嫕有節操自劉氏廢常稱疾不朝會莽敬憚傷哀欲  
嫁之乃更號為黃皇室主令立國將軍成新公孫建世  
子祿飾將醫往問疾后大怒笞鞭其旁侍御因發病不  
肯起莽遂不復彊也及漢兵誅莽燒燔未央宮后曰何

面目以見漢家自投火中而死

後漢

范曄曰夏殷以上后妃之制其文畧矣周禮王者立后  
三夫人九嬪二十七世婦八十一女御以備內職焉后  
正位宮闈同體天王夫人坐論婦禮九嬪掌教四德世  
婦主喪祭賓客女御序于王之燕寢頒官分務各有典  
司女史彤管記功書過居有保阿之訓動有環佩之響  
進賢才以輔佐君子衷窈窕而不淫其色所以能述宣



陰化修成內則閨房肅雍險謁不行也故康王晚朝關  
雎作諷宣后晏起姜氏請愆及周室東遷禮序凋缺諸  
侯僭縱軌制無章齊桓有如夫人者六人晉獻升戎女  
為元妃終於五子作亂冢嗣遘屯爰逮戰國風憲逾薄  
適情任欲顛倒衣裳以至破國亡家不可勝數斯固輕  
禮弛防先色後德者也秦并天下多自驕大宮備七國  
爵列八品漢興因循其號而婦制莫釐高祖帷薄不修  
孝文衽席無辯然而選納尚簡飾翫少華自武元之後

世增淫費至乃掖庭三千增級十四妖幸毀政之符外  
姻亂邦之迹前史載之詳矣及光武中興斷彫為朴六  
宮稱號唯皇后貴人貴人金印紫綬奉不過粟數十斛  
又置美人宮人采女三等並無爵秩歲時賞賜充給而  
已漢法常因八月算人遣中大夫與掖庭丞及相工於  
洛陽鄉中閱視良家童女年十三以上二十以下姿色  
端麗合法相者載還後宮擇視可否乃用登御所以明  
慎聘納詳求淑哲明帝聿遵先旨宮教頗修登建嬪后

必先令德內無出閫之言權無私溺之授可謂矯其敝  
矣向使因設外戚之禁編著甲令改正后妃之制貽厥  
方來豈不休哉雖御已有度而防閑未篤故孝章以下  
漸用色授恩隆好合遂忘淄蠹自古雖主幼時艱王家  
多釁必委成冢宰簡求忠賢未有專任婦人斷割重器  
唯秦苻太后始攝政事故穰侯權重於昭王家富於嬴  
國漢仍其謬知患莫改東京皇統屢絕權歸女主外立  
者四帝

安質桓靈

臨朝者六后

章帝竇太后和熹鄧太后安  
思閭太后順烈梁太后桓思

實太后靈  
思何太后

莫不定策帷帟委事父兄貪孩童以久其政

抑明賢以專其威任重道悠利深禍速身犯霧露於雲  
臺之上家嬰縲紲於圜犴之下湮滅連踵傾軛繼路而  
赴蹈不息焦爛為期終陵夷大運淪亡神寶詩書所歎  
畧同一揆故考列行跡以為皇后本紀雖成敗事異而  
同居正號者並列于編其以私恩追尊非當時所奉者  
則隨他事附出親屬別事各依列傳其餘無所見則係  
之此紀以續西京外戚云爾

光武郭皇后諱聖通真定豪人也為郡著姓父昌讓田宅財產數百萬與異母弟國人義之仕郡功曹娶真定恭王女號郭主生后及子況昌早卒郭主雖王家女好禮節儉有母儀之德更始二年春光武擊王郎至真定因納后有寵及即位以為貴人建武元年生皇子彊帝善況小心謹慎況年始十六拜黃門侍郎二年貴人立為皇后彊為皇太子封況縣蠻侯況雖以后弟貴重而謙恭下士頗有聲譽十四年遷城門校尉其後后以寵

稍衰數懷怨懟十七年廢為中山王太后進后中子右  
翊公輔為中山王徙封況大國為陽安侯后從兄竟以  
騎都尉從征伐有功封為新鄭侯官至東海相竟弟匡  
為發干侯官至太中大夫后叔父梁早終無子其壻南  
陽陳茂以恩澤封南縣侯二十年中山王輔復徙封沛  
王后為沛太后況遷大鴻臚帝數幸其第會公卿諸侯  
親家飲燕賞賜金錢縑帛豐盛莫比京師號況家為金  
穴二十六年后母郭主薨帝臨喪送葬遣使迎昌喪柩

與主合葬追贈昌陽安侯謚曰思二十八年薨葬北  
芒帝憐郭氏詔況子璜尚涇陽公主除璜為郎顯宗即  
位況與帝舅陰識陰就並為特進俱被恩寵永平二年  
況卒帝親自臨喪謚曰節侯子璜嗣元和三年肅宗北  
巡過真定會諸郭以太牢上郭主冢賞賜甚多永元初  
璜為長樂少府子舉為侍中兼射聲校尉及大將軍憲  
被誅舉以憲子壻謀逆故父子俱下獄死家屬徙合浦  
宗族為郎吏者悉免官新鄣侯竟初為騎將從征伐有

功拜東海相永平中卒子嵩嗣嵩卒追坐染楚王英事  
國廢建初二年章帝紹封嵩子勤為伊亭侯勤無子國  
除發干侯匡官至太中大夫建武三十年卒子勲嗣勲  
卒子駿嗣永平十三年亦坐楚王英事失國建初三年  
復封駿為觀都侯卒無子國除郭氏侯者凡三人皆絕  
國

光烈陰皇后諱麗華南陽新野人初光武適新野間后  
美心悅之後至長安見執金吾車騎甚盛歎曰仕宦當



作執金吾娶妻當得陰麗華更始元年六月遂納后於宛當成里時年十九及光武為司隸校尉方西之洛陽令后歸新野及鄧奉起兵后兄識為之將后隨家屬徙涇陽止於奉舍光武即位令侍中傅俊迎后與胡陽寧平主諸宮人俱到洛陽以后為貴人帝以后雅性寬仁欲崇以尊位后固辭以郭氏有子終不肯當故遂立郭氏為后建武四年從征彭寵生顯宗於元氏九年有盜劫殺后母鄧氏及弟訢帝甚傷之詔追爵諡貴人父陸

為宣恩哀侯弟訢為宣義恭侯以弟就嗣哀侯後十七年廢皇后郭氏而立貴人為皇后后在位恭儉少嗜玩不喜笑謔性仁孝多矜慈七歲失父雖已數十年言及未曾不流涕帝見嘗歎息顯宗即位尊后為皇太后永平三年帝從太后幸章陵置酒舊宅會陰鄧故人諸家子孫並受賞賜七年崩在位二十四年年六十合葬原陵明帝性孝追慕無已十七年正月當謁原陵夜夢先帝太后如平生懽既寤悲不能寐即按歷明日吉遂

率百官及故客上陵其日甘露降於陵樹帝令百官採取以薦會畢帝從席前伏御牀視太后鏡奩中物感動悲涕令易脂澤裝具左右皆泣莫能仰視焉

明德馬皇后諱某伏波將軍援之小女也少喪父母兄客卿敏惠早夭母藺夫人悲傷發疾恍惚后時年十歲幹治家事勅制僮僕內外諮稟事同成人諸家異之后常久疾太夫人令筮之筮者曰此女雖有患狀而當大貴兆不可言也後又呼相者使占諸女相者見后大驚

曰我必為此女稱臣然貴而少子若養他子者得力乃當踰於所生初援征五溪蠻卒於師虎賁中郎將梁松黃門侍郎竇固等因譖之由是家並失勢又數為權貴所侵侮后從兄嚴不勝憂憤白太夫人絕竇氏婚求進女掖庭乃上書曰臣叔父援孤恩不報而妻子特獲恩全人情既得不死便欲求福竊聞太子諸王妃匹未備援有三女大者十五次者十四小者十三儀狀膚髮上中以下皆孝順小心婉靜有禮願下相工簡其可否如

有萬一援不朽於黃泉矣又援姑姊妹並為成帝婕妤  
冀因緣先姑當充後宮由是選入太子宫時年十三奉  
承陰后傍接同列禮則修備上下安之遂見寵異常居  
後堂顯宗即位以后為貴人時后前母姊女賈氏亦以  
選入生肅宗帝以后無子命令養之謂曰人未必當自  
生子但患愛養不至耳后於是撫育盡悴過於所生肅  
宗亦孝性淳篤恩性天至母子慈愛始終無纖介之間  
永平三年春有司奏立長秋宮帝未有所言皇太后曰

馬貴人德冠後宮即其人也遂立為皇后先是數日夢  
有小飛蟲無數赴着身又入皮膚中而後飛出既正位  
宮闈愈自謙肅后身長七尺二寸方口美髮能誦易好  
讀春秋楚辭尤善周官董仲舒書

仲舒書玉杯蕃露  
清明竹林之屬

常

衣大練裙不加緣朔望諸姬主朝請望見后袍衣疎麤  
反以為綺縠就視乃笑后辭曰此繒特宜染色故用之  
耳六宮莫不歎息帝嘗幸苑囿離宮后趣以風邪霧露  
為戒辭意款備多見詳擇帝幸濯龍中並召諸才人

濯龍

名園

下邳王以下皆在側請呼皇后帝笑曰是家志不好  
樂雖來無歡是以游娛之事希常從焉十五年帝案地  
圖將封皇子悉半諸國后見而言曰諸子食數縣於制  
不已儉乎帝曰我子豈宜與先帝子等乎歲給二十萬  
足矣時楚獄連年不斷囚相證引坐繫者甚衆后慮其  
多濫乘間言及惻然帝感悟之夜起彷徨為思所納卒  
多降宥時諸將奏事及公卿較議難平者帝數以試后  
后輒分解理趣各得其情每於侍執之際輒言及政事

多所毗補而未嘗以家私干欲寵敬日隆始終無衰及  
帝崩肅宗即位尊為皇太后諸貴人當徙居南宮太后  
感析別之懷各加厚賜自撰顯宗起居注削去兄防參  
醫藥事帝請之曰黃門舅旦夕共養且一年既無裒異  
又不錄勤勞無乃過乎太后曰吾不欲令後世聞先帝  
數親後宮之家故不著也建初元年欲封爵諸舅太后  
不聽明年夏大旱言事者以為不封外戚之故有司因  
此上奏宜因舊典太后詔曰凡言事者皆欲媚朕以要



福耳昔王氏五侯同日俱封其時黃霧四塞不聞澍雨  
之應又田蚡寶嬰寵貴橫恣終至傾覆故先帝防慎舅  
氏不令在樞機之任諸子之封裁令半楚淮陽諸國常  
謂我子不當與先帝子等今有司柰何欲以馬氏比陰  
氏乎吾為天下母而身服大練食不求甘左右但著帛  
布無香熏之飾者欲身率下也以為外親見之當傷心  
自勅但笑言太后素好儉前過濯龍門上見外家問起  
居車如流水馬如游龍倉頭衣綠構領袖正白顧侍御

者不及遠矣故不加譴怒但絕歲用而已冀以默愧其  
心而猶憊怠無憂國忘家之慮吾豈可上負先帝之旨  
下虧先人之德重襲西京敗亡之禍哉固不許帝省詔  
悲歎復重請曰漢興舅氏之封侯猶皇子之為王也太  
后誠存謙虛奈何令臣獨不加恩於三舅乎且衛尉年  
尊兩校尉有大病如令不諱使臣長抱刻骨之恨宜及  
吉時不可稽留太后報曰吾反覆念之思令兩善豈徒  
欲獲謙謙之名而使帝受不外施之嫌哉昔竇太后欲

封王皇后之兄丞相條侯言受高帝約無軍功非劉氏  
不侯今馬氏無功於國豈得與陰郭中興之后等邪常  
觀富貴之家祿位重疊猶再實之木其根必傷且人所  
以願封侯者欲上奉祭祀下求溫飽耳今祭祀則受四  
方之珍衣食則蒙御府餘資斯豈不足而必當得一縣  
乎吾計之熟矣勿有疑也夫至孝之行安親為上今數  
遭變異穀價數倍憂惶晝夜不安坐卧而欲先營外封  
違慈母之拳拳乎吾素剛急有胃中氣不可不順也若

陰陽調和邊境清靜然後行子之志吾但含飴弄孫不能復關政矣時新平主家御者失火延及北閣後殿太后以為已過起居不歡時當謁原陵太后自引守備不愆慙見陵園遂不行太后常見外戚有謙素義行者輒假借溫言賞以財位其有車服不軌法度者便絕屬籍於是內外從化被服如一諸家惶恐倍於永平時乃置織室蠶於濯龍中數往觀視以為娛樂常與帝旦夕言道政事及教授諸小王論語經書述叙平生雍和終日

四年天下豐稔方垂無事帝遂封三舅廖防光為列侯並辭讓願就關內侯太后聞之曰聖人設教各有其方知人情性莫能齊也吾少壯時但慕竹帛志不顧命令雖已老而復戒之在得故日夜惕厲思自降損居不求安食不念飽冀乘此道不負先帝所以化導兄弟共同斯志欲令瞑目之後無所復恨何意老志復不從哉萬年之日長恨矣廖等不得已受封爵而退位歸第焉太后其年寢疾不信巫祝卜醫數勅絕禱祠至六月崩在

位二十三年年四十餘合葬顯節陵賈貴人南陽人建武末選入太子宫中元二年生肅宗而顯宗以為貴人帝既為太后所養專以馬氏為外家故貴人不登極位賈氏親族無受寵榮者及太后崩乃策書加貴人王赤綬安車一駟永巷宮人二百御府雜帛二萬匹大司農黃金千斤錢二十萬

章德竇皇后諱某扶風平陵人大司徒融之曾孫也祖穆父勲坐事死事在竇融傳勲尚東海恭王彊女泚陽

公主后其長女也家既廢壞數呼相工問息耗見后者皆言當大尊貴非臣妾容貌年六歲能書親家皆奇之建初二年后與女弟俱以選例入見長樂宮進止有序風容甚盛肅宗先聞后有才色數以訊諸姬傳及見雅以為美馬太后亦異焉因入掖庭見於北宮章德殿后性敏給傾心承接稱譽日聞明年遂立為皇后妹為貴人七年追爵諡父勲為安成思侯后寵幸特殊專固後宮初宋貴人生皇太子慶梁貴人生和帝后既無子並

忌疾之數間於帝漸致疎嫌因誣宋貴人挾邪媚道遂  
自殺廢慶為清河王語在慶傳梁貴人者梁竦之女也  
少失母為伯母舞陰長公主所養年十六建初二年亦  
與中姊俱選入掖庭為貴人四年生和帝后養以為已  
子欲專名外家而忌梁氏八年乃作飛書以陷竦竦坐  
誅貴人姊妹以憂死自是宮房慄息后愛日隆及帝崩  
和帝即位尊后為皇太后皇太后臨朝尊母沘陽公主  
為長公主兄憲弟篤景皆貴顯擅威權後遂密謀不軌



永元四年發覺被誅九年太后崩未及葬而梁貴人姊  
嬖上書陳貴人枉歿之狀太尉張酺司徒劉方司空張  
奮上奏依光武黜呂太后故事貶太后尊號不宜合葬  
先帝百官亦多上言者帝手詔曰竇氏雖不遵法度而  
太后常自減損朕奉事十年深惟大義禮臣子無貶尊  
上之文恩不忍離義不忍虧案前世上官太后亦無降  
黜其勿復議於是合葬敬陵在位十八年帝以貴人酷  
歿歛葬禮闕乃改殯梁貴人於承光宮謚曰恭懷皇后

追服喪制百官縞素與姊大貴人俱葬西陵儀比敬園

敬園安帝祖母  
宋貴人之園也

和帝陰皇后諱某光烈皇后兄執金吾識之曾孫也后少聰慧善書藝永元四年選入掖庭以先后近屬故得為貴人有殊寵八年遂立為皇后自和熹鄧后入宮愛寵稍衰數有恚恨后外祖母鄧朱出入宮掖十四年夏有言后與朱共挾巫蠱道事發覺帝遂使中常侍張慎與尚書陳寢於掖庭獄雜考案之朱及二子奉毅與后

弟軼輔啟辭語相連及以為祠祭祀詛大逆無道奉殺  
輔考死獄中帝使司徒魯恭持節賜后策上璽綬遷于  
桐宮以憂死立七年葬臨平亭部父特進綱自殺軼啟  
及朱家屬徙日南北景縣宗親外內昆弟皆免官還田  
里永初四年鄧太后詔赦陰氏徙者歸故郡還其貲財  
五百餘萬

和熹鄧皇后諱綏太傅禹之孫也父訓護羌校尉母陰  
氏光烈皇后從弟女也后年五歲太傅夫人愛之自為

翦髮夫人年高目冥誤傷后額忍痛不言左右見者怪而問之后曰非不痛也難傷老人意故忍之耳六歲能史書十二通詩論語諸兄每讀經傳輒下意問難志在典籍不問居家之事母常非之曰汝不習女工以供衣服乃更務學寧當舉博士邪后重違母言晝修婦業暮誦經典家人號為諸生父訓異之事無大小輒與詳議永元四年當以選入會訓卒后晝夜號泣終三年不食鹽菜憔悴毀容后嘗夢捫天蕩蕩正青若有鐘乳狀乃

仰漱飲之以訊諸占夢言堯夢攀天而上湯夢及天而  
咍之斯皆聖王之前占吉不可言又相者見后驚曰此  
成湯之法也家人竊喜而不敢宣后叔父陔言常聞活  
千人者子孫有封兄訓為謁者使修石曰河歲活數千  
人天道可信家必蒙福初太傅禹嘗歎曰吾將百萬之  
衆未嘗妄殺一人後世必有興者七年后復與諸家子  
俱選入宮后長七尺二寸姿顏姝麗絕異於衆左右皆  
驚八年冬入掖庭時年十六遂為貴人恭肅小心事陰

后盡禮接撫同列常克已以下之雖宮人隸役皆加恩  
借帝深嘉焉后嘗有疾帝令后母兄入視醫藥不限以  
日數后言於帝曰宮禁至重而使外舍久在內省上令  
陛下有幸私之議下使賤妾獲不知足之謗上下交損  
誠不願也帝曰人皆以數入為榮貴人反以為憂深自  
抑損誠難及也每有讌會諸姬貴人競自修整簪珥光  
采袿裳鮮明而后獨著素裝服無飾其衣有與陰后同  
色者即時解易若並時進見則不敢正坐離立行則僂

身自卑帝每有所問常逡巡後對不敢先陰后言帝知  
后勞心曲體歎曰修德之勞廼如是乎後陰后漸踈每  
常御見輒辭以疾時帝數失皇子后憂繼嗣不廣數選  
進才人以博帝意陰后見后德稱日盛不知所為遂造  
祝詛欲以為害帝嘗寢病危甚陰后密言我得意不令  
鄧氏復有遺類后聞乃對左右涕泣曰我竭誠盡心以  
事皇后竟不為所祐而當獲罪於天婦人雖無從死之  
義然周公身請武王之命越姬心誓必死之分上以報

帝之恩中以解宗族之禍下不令陰氏有人豕之譏即欲飲藥宮人趙王者固禁之因詐言屬有使來上疾已愈后信以為然乃止明日帝果瘳十四年夏陰后以巫蠱事發后請救不能得帝便屬意焉后愈稱疾篤深自閉絕會有司奏建長秋宮詔立后焉后辭讓者三然後即位手書表謝是時方國貢獻競求珍麗之物自后即位悉令禁絕歲時但供紙墨而已帝每欲官爵鄧氏后輒哀請謙讓故兄騭終帝世不過虎賁中郎元興元年



帝崩長子平原王有疾而諸皇子夭歿前後十數後生者輒隱祕養於人間殤帝生始百日后乃迎立之尊后為皇太后太后臨朝和帝既葬宮人並令歸園太后贈賜甚厚是時新遭大憂法禁未設宮中亡大珠一篋太后念欲考問必有不辜乃親閱宮人觀察顏色即時首服又和帝幸人吉成為御者誣告以巫蠱事下掖庭考訊辭證明白太后疑之呼見實覈果御者所為莫不歎服以為聖明太后以淫祀無福詔罷諸祠官不合典禮

者又詔赦除建武以來諸犯妖惡及馬竇家屬所被禁錮者皆復之為平人減太官導官尚方內者服御珍羞靡麗難成之物自非供陵廟稻粱米不得導擇朝夕一肉飯而已舊太官湯官歲用二萬萬自是裁數千萬郡國所貢皆減其過半悉斥賣上林鷹犬其蜀漢釵器九帶佩刀並不復調止畫工三十九種又御府尚方織室錦繡冰紈綺縠金銀珠玉犀象瑇瑁雕鏤玩弄之物皆絕不作離宮別館儲峙米糒薪炭悉令省之又自御北

宮增喜觀閱問諸園貴人聽其去留即日免遣者五六百人及殤帝崩太后定策禁中立安帝后猶臨朝聽政以連遭大憂百姓苦役殤帝康陵方中祕藏及諸工作事事減約十分居一詔告司隸校尉河南尹南陽太守令明加檢察外家親屬其有犯罪無得假貸永初元年爵號太夫人為新野君萬戶供湯沐邑二年夏京師大旱親幸洛陽寺錄冤獄有囚實不殺人被告自誣羸困輿見畏吏不敢言將去舉頭若欲自訴太后察視覺之

即呼還問狀具得枉實即收洛陽令下獄抵罪行未還  
宮澍雨大降三年秋太后體不安左右禱請祝辭願得  
代命太后聞之即加譴怒舊事歲終當饗遣衛士大儺  
逐疫太后以陰陽不和軍旅數興詔饗會勿設戲作樂  
減逐疫侏子之半悉罷象橐駝之屬豐年復故太后自  
入宮掖從曹大家受經書兼天文算數晝省王政夜則  
誦讀而患其謬誤懼乖典章乃博選諸儒劉珍等及博  
士議郎四府掾史五十餘人詣東觀讎校傳記事畢奏

御班賜有差又詔中官近臣於東觀受讀經傳以教授  
宮人左右習誦朝夕濟濟及新野君薨太后憂哀毀損  
贈送甚厚使司空持節護喪事謚曰敬君太后諒闇既  
終七年正月初入太廟齋七日庚戌謁宗廟率命婦群  
妾相禮儀與皇帝交獻親薦成禮而退因下詔自今凡  
供薦新味奉祠陵廟及給御者皆須時乃上凡所省二  
十三種自太后臨朝水旱十歲四夷外侵盜賊內起每  
聞人饑或達旦不寐而躬自減徹以救災阨故天下復

平歲還豐稔元初五年平望侯劉毅以太后多德政欲令早有注記上書安帝述太后之美宜令史官著長樂宮注聖德頌帝從之六年太后詔徵和帝弟濟北河間王子男女年五歲以上四十餘人又鄧氏近親子孫三十餘人並為開邸第教學經書躬自監試時太后從兄越騎校尉康以后久臨朝政內懷憂懼託病不朝太后使宮婢問之宮婢失禮於康康詬之婢還言康詐疾而語不遜太后遂免康官遣歸國絕屬籍永寧二年二月

太后寢疾漸篤乃乘輦於前殿見侍中尚書因北至太子新所繕宮還大赦天下賜諸園貴人王主群僚錢布各有差詔曰朕以無德託母天下而薄祐不天早離大憂延平之際海內無主元元危運危於累卵勤勤苦心不敢以萬乘為樂上欲不欺天愧先帝下不違人負宿心誠在濟度百姓以安劉氏自謂感徹天地當蒙福祚而喪禍內外傷痛不絕頃以廢病沉滯久不侍祠自力上原陵加咳逆唾血遂至不鮮存亡大分無可柰何公

卿百官其勉盡忠恪以輔朝廷三月崩在位二十年年  
四十一合葬順陵

安思閭皇后諱姬河南滎陽人也祖父章永平中為尚  
書以二妹為貴人章有精力曉舊典久次當遷以重職  
顯宗為後宮親屬竟不用出為步兵校尉章生暢暢生  
后后有才色元初元年以選入掖庭甚見寵愛為貴人  
二年立為皇后后專房妬忌帝幸官人李氏生皇子保  
遂鴆殺李氏三年以后父侍中暢為長水校尉封北宜



春侯四年暢卒諡曰文侯子顯嗣建光元年鄧太后崩  
帝始親政三年以顯及弟景耀晏並為卿校典禁兵延  
光元年更封顯長社縣侯追尊后母宗為滎陽君顯景  
諸子弟年皆童齒並為黃門侍郎后寵既盛而兄弟頗  
預朝權后遂與大長秋江京中常侍樊豐等共譖皇太  
子保廢為濟陰王四年春后從帝幸章陵帝道疾崩於  
葉縣后顯兄弟及江京樊豐等謀曰今晏駕道次濟陰  
王在內邂逅公卿立之還為大害乃偽云帝疾甚徙御

卧車行四日驅馳還宮明日詐遣司徒劉喜詣郊廟社稷告天請命其夕乃發喪尊后曰皇太后皇太后臨朝以顯為車騎將軍儀同三司太后欲久專國政貪立幼年與顯等定策禁中迎濟北惠王子北鄉侯懿立為皇帝顯忌大將軍耿寶位尊權重威行前朝乃風有司奏寶及其黨與中常侍樊豐虎賁中郎將謝惲惲弟侍中篤篤弟大將軍長史宓侍中周廣阿母野王君王聖聖女永永婿黃門侍郎樊嚴等更相阿黨互作威福探刺

禁省更為唱和皆大不道豐憚廣皆下獄死家屬徙比  
景宓嚴減死髡鉗貶寶為則亭侯遣就國自殺王聖母  
子徙鴈門於是景為衛尉耀城門校尉晏執金吾兄弟  
權要威福自由少帝立二百餘日而疾篤顯兄弟及江  
京等皆在左右京引顯屏語曰北鄉侯病不解國嗣宜  
時有定前不用濟陰王今若立之後必當怨又何不早  
徵諸王子簡所置乎顯以為然及少帝薨京白太后徵  
濟北河間王子未至而中黃門孫程合謀殺江京等立

濟陰王是為順帝顯景晏及黨與皆伏誅遷太后於離宮家屬徙比景明年太后崩在位十二年合葬恭陵帝母李氏瘞在洛陽城北帝初不知莫敢以聞及太后崩左右白之帝感悟發哀親到瘞所更以禮殯上尊諡曰恭愍皇后葬恭北陵為策書金匱藏于世祖廟

順烈梁皇后諱妣大將軍商之女恭懷皇后弟之孫也后生有光景之祥少善女工好史書九歲能誦論語治韓詩大義略舉常以列女圖畫置於左右以自監戒父

商深異之竊謂諸弟曰我先人全濟河西所活者不可勝數雖大位不究而積德必報若慶流子孫者儻興此女乎永建三年與姑俱選入掖庭時年十三相工茅通見后驚再拜賀曰此所謂日角偃月相之極貴臣所未嘗見也太史卜兆得壽房又筮得坤之比遂以為貴人常特被引御從容辭於帝曰夫陽以博施為德陰以不專為義螽斯則百福之所由興也願陛下思雲雨之均澤識貫魚之次序使小妾得免罪謗之累由是帝加敬

焉陽嘉元年春有司奏立長秋宮帝遂立貴人為皇后  
后既少聰慧深覽前世得失雖以德進不敢有驕專之  
心每日月見謫輒降服求愆建康元年帝崩后無子美  
人虞氏子炳立是為沖帝尊后為皇太后太后臨朝沖  
帝尋崩復立質帝猶秉朝政時揚徐劇賊寇擾州郡西  
羌鮮卑及日南蠻夷攻城暴掠賦斂煩數官民困竭太  
后夙夜勤勞推心仗賢委任太尉李固等拔用忠良務  
崇節儉其貪叨罪惡多見誅廢分兵討伐群寇消夷故

海內肅然宗廟以寧而兄大將軍冀鸛殺質帝專權暴  
濫忌害忠良數以邪說疑誤太后遂立桓帝而誅李固  
太后又溺於宦官多所封寵以此天下失望和平元年  
春歸政於帝太后寢疾遂篤乃御輦幸宣德殿見宮省  
官屬及諸梁兄弟各勉以盡忠於國後二日而崩在位  
十九年年四十五合葬憲陵虞美人者以良家子年十  
三選入掖庭又生女舞陽長公主自漢興母氏莫不尊  
寵順帝既未加美人爵號而冲帝早夭大將軍梁冀秉

政忌惡他族故虞氏抑而不登但稱大家而已陳夫人者家本魏郡少以聲伎入孝王宮得幸生質帝亦以梁氏故榮寵不及焉熹平四年小黄門趙祐議郎卑整以為言帝乃拜虞大家為憲陵貴人陳夫人為渤海孝王妃使中常侍持節授印綬遣太常以三牲告憲陵懷陵靜陵焉

孝崇愷皇后諱明為蠡吾侯翼媵妾生桓帝桓帝即位明年追尊翼為孝崇皇陵曰博陵以后為博園貴人和



平元年梁太后崩乃就博陵追尊后為孝崇皇后遣司徒持節奉策授璽綬齋乘輿器服備法物宮曰永樂置太僕少府以下皆如長樂宮故事又置虎賁羽林衛士起宮室分鉅鹿九縣為后湯沐邑在位三年元嘉二年崩以帝弟平原王石為喪主歛以東園畫梓壽器玉匣飯含之具禮儀制度比恭懷皇后使司徒持節大長秋奉弔祠賻錢四十萬布四萬匹中謁者僕射典護喪事侍御史護大駕鹵簿詔安平王豹河間王建渤海王悝

長社益陽二長公主與諸國侯在三百里內者及中二千石二千石令長相皆會葬將作大匠復土繕廟合葬博陵

桓帝懿獻梁皇后諱女瑩順烈皇后之女弟也帝初為蠡吾侯梁太后徵欲與后為婚未及嘉禮會質帝崩因以立帝明年太后詔納后故事一依舊典時建和六年六月始入掖庭八月立為皇后時太后秉政而梁冀專朝故后獨得寵幸自下莫得進見后藉姊兄廕執恣極

奢侈服御制度兼倍前世及皇太后崩恩愛稍衰后既無子潛懷怨忌每宮人孕育鮮得全者帝雖逼畏梁冀不敢譴怒然見御轉稀至延熹三年后以憂恚崩在位十三年葬懿陵其歲誅梁冀廢懿陵為貴人冢焉

桓帝鄧皇后諱猛女和熹皇后從兄子鄧香之女也母宣初適香生后改嫁梁紀紀者大將軍梁冀妻孫壽之舅也后少孤隨母為居因姓梁氏冀妻見后貌美永興中進入掖庭為采女絕幸明年封兄鄧演為南頓侯位

特進演卒子康嗣及懿獻后崩梁冀誅立后為皇后帝  
惡梁氏改姓為薄封后母宣為長安君四年有司奏后  
本郎中鄧香之女不宜改易他姓於是復為鄧氏追封  
贈香車騎將軍安陽侯印綬更封宣康大縣宣為昆陽  
君康為泚陽侯賞賜巨萬計宣卒賙贈葬禮皆依后母  
舊儀以康弟統襲封昆陽侯位侍中統從兄會襲安陽  
侯為虎賁中郎將又封統弟秉為滎陽侯宗族皆列校  
郎將帝多內幸博採宮女至五六千人及驅役從使復

兼倍於此而后恃尊驕忌與帝所幸郭貴人更相譖訴  
八年詔廢后送暴室以憂死立七年葬在北邙從父河  
南尹萬世及會皆下獄死統等亦繫暴室免官爵歸本  
郡財物没入縣官

桓思竇皇后諱妙華章德皇后從祖弟之孫女也延熹  
八年鄧皇后廢后以選入掖庭為貴人其冬立為皇后  
而御見甚稀帝所寵唯采女田聖等永康元年冬帝寢  
疾遂以聖等九女皆為貴人及崩無嗣后為皇太后太

后臨朝定策立解瀆侯宏是為靈帝太后素忌忍積怒  
田聖等桓帝梓宮尚在前殿遂殺田聖又欲盡誅諸貴  
人中常侍管霸蘇康苦諫乃止時太后父大將軍武謀  
誅宦官而中常侍曹節等矯詔殺武遷太后於南宮雲  
臺家屬徙比景竇氏雖誅帝猶以太后有援立之功建  
寧四年十月朔率群臣朝於南宮親饋上壽黃門令董  
萌因此數為太后訴怨帝深納之供養資奉有加於前  
中常侍曹節王甫疾萌附助太后誣以謗訕永樂宮萌

坐下獄死熹平元年太后母卒於比景后感疾而崩立  
七年合葬于宣陵

孝仁董皇后諱某河間人為解瀆侯萇夫人生靈帝建  
寧元年帝即位追尊萇為孝仁皇陵曰慎陵以后為慎  
園貴人及竇氏誅明年帝使中常侍迎貴人并徵貴人  
兄寵到京師上尊號曰孝仁皇后居南宮嘉德殿宮稱  
永樂拜寵執金吾後坐矯稱永樂后屬請下獄死及竇  
太后崩始與朝政使帝賣官求貨自納金錢盈滿堂室

中平五年以后兄子衛尉脩侯重為驃騎將軍領兵千餘人初后自養皇子協數勸帝立為太子而何皇后恨議未及定而帝崩何太后臨朝重與太后兄大將軍進權執相害后每欲參干政事太后輒相禁塞后忿恚詈言曰汝今輒張怙汝兄邪當勅驃騎斷何進頭來何太后聞以告進進與三公及弟車騎將軍苗等奏孝仁皇后使故中常侍夏惲永樂太僕封諤等交通州郡辜較在所珍寶貨賂悉入西省蕃后故事不得留京師輿服



有章膳羞有品請永樂后遷宮本國奏可何進遂舉兵圍驃騎府收重免官自殺后憂怖疾病暴崩在位二十二年民間歸咎何氏喪還河間合葬慎陵

靈帝宋皇后諱某扶風平陵人也肅宗宋貴人之從曾孫也建寧三年選入掖庭為貴人明年立為皇后父鄴執金吾封不其鄉侯后無寵而居正位後宮幸姬衆共讒毀初中常侍王甫枉誅渤海王悝及妃宋氏妃即后之姑也甫恐后怨之乃與太中大夫程阿共構言皇后

挾左道祝詛帝信之光和元年遂策收璽綬后自致暴  
室以憂死在位八年父及兄弟並被誅諸常侍小黃門  
在省闥者皆憐宋氏無辜共合錢物收葬廢后及鄴父  
子歸宋氏舊塋臯門亭帝後夢見桓帝怒曰宋皇后有  
何罪而聽用邪孽使絕其命渤海王惺既已自貶又受  
誅斃今宋氏及惺自訴於天上帝震怒罪在難赦夢殊  
明察帝既覺而恐以事問於羽林左監許永曰此何祥  
其可禳乎對曰宋皇后親與陛下共承宗廟母臨萬國

歷年已久海内蒙化過惡無聞而虛被讒誣身嬰極誅  
禍及家族天下臣妾咸為痛怨渤海王悝桓帝母弟也  
處國奉藩未嘗有過陛下曾不證審遂伏其辜昔晉侯  
失刑亦夢大厲被髮屬地天道明察鬼神難誣宜並改  
葬以安冤魂反宋后之徙家復渤海之先封以消厥咎  
帝不能用尋亦崩焉

靈思何皇后諱某南陽宛人家本屠者以選入掖庭長  
七尺一寸生皇子辯養於史道人家號曰史侯拜后為

貴人甚有寵幸性彊忌後宮莫不震懾光和三年立為皇后明年追號后父真為車騎將軍舞陽宣德侯因封后母興為舞陽君時王美人任娠畏后乃服藥欲除之而胎安不動又數夢負日而行四年生皇子協后遂鸞殺美人帝大怒欲廢后諸宦官固請得止董太后自養協號曰董侯王美人趙國人也祖父苞五官中郎將美人豐姿色聰敏有才明能書會計以良家子應法相選入掖庭帝愍協早失母又思美人作追德賦令儀頌中

平六年帝崩皇子辯即位尊后為皇太后太后臨朝后  
兄大將軍進欲誅宦官反為所害舞陽君亦為亂兵所  
殺并州牧董卓被徵將兵入洛陽陵虐朝廷遂廢少帝  
為弘農王而立協是為獻帝扶弘農王下殿北面稱臣  
太后鯁涕群臣含悲莫敢言卓又議太后跣逼永樂宮  
至令憂死逆婦姑之禮乃遷於永安宮因進鵠崩在位  
十年董卓令帝出奉常亭舉哀公卿皆白衣會不成喪  
也合葬文昭陵初太后新立當謁二祖廟欲齋輒有變

故如此者數竟不克時有識之士心獨怪之後遂因何氏傾沒漢祚焉明年山東義兵大起討董卓卓乃置弘農王於閣上使郎中令李儒進鵠曰服此藥可以辟惡王曰我無疾是殺我耳不肯飲彊飲之不得已乃與妻唐姬及宮人飲宴為別酒行王悲歌曰天道易兮我何艱棄萬乘兮退守蕃逆臣見逼兮命不延逝將去汝兮適幽元因令唐姬起舞姬抗袖而歌曰皇天崩兮后土頽身為帝兮命天摧死生路異兮從此乖柰我煢獨兮心

中哀因泣下嗚咽坐者皆歔歔王謂姬曰卿王者妃執  
不復為吏民妻自愛從此長辭遂飲藥而死時年十八  
唐姬潁川人也王薨歸鄉里父會稽太守瑁欲嫁之誓  
不許及李傕音覺破長安遣兵鈔關東略得姬傕因欲妻  
之固不聽而終不自名尚書賈詡知之以狀白獻帝帝  
聞感愴乃下詔迎姬置園中使侍中持節拜為弘農王  
妃初平元年二月葬弘農王於故中常侍趙忠成塋中  
諡曰懷王帝求母王美人兄斌斌將妻子詣長安賜第

宅田業拜奉車都尉興平元年追尊王美人為靈懷皇后改葬文昭陵儀比敬恭二陵使光祿大夫持節行司空事奉璽綬斌與河南尹駱業復土斌還遷執金吾封都亭侯食邑五百戶病卒贈前將軍印綬長子端襲爵獻帝伏皇后諱壽琅邪東武人大司徒湛之八世孫也父完沈深有度襲爵不其侯尚桓帝女陽安公主為侍中初平元年從駕入長安后時選入掖庭為貴人興平二年立為皇后完遷執金吾帝尋而東歸李傕郭汜



等追敗乘輿於曹陽帝潛夜度河走六宮皆步行出營  
后手持縑數匹董承使符節令孫徽以刃脅奪之殺旁  
侍者血濺后衣既至安邑御服穿弊唯以棗栗為糧建  
安元年拜完輔國將軍儀比三司完以政在曹操自嫌  
尊戚乃上印綬拜中散大夫尋遷屯騎校尉十四年卒  
子典嗣自帝都許守位而已宿衛兵侍莫非曹氏黨舊  
姻戚議郎趙彥嘗為帝陳言時策曹操惡而殺之其餘  
內外多見誅戮操後以事入見殿中帝不任其憤因曰

君若能相輔則厚不爾幸垂恩相捨操失色俛仰求出  
舊儀三公領兵朝見令虎賁執刀挾之操出顧左右汗  
流浹背自後不敢復朝時將軍董承女為貴人操誅承  
而求貴人殺之帝以貴人有娠累為請不能得后自是  
懷懼遂與父完書言曹操殘逼之狀令密圖之完不敢  
發至十九年事乃露洩操追仇大怒遂逼帝廢后假為  
策文令御史大夫郗慮持節策廢后又以尚書令華歆  
為郗慮副勒兵入宮收后后聞之閉戶藏夾壁中歆就

牽后出時帝在外殿引慮於坐后被髮徒跣行泣過謂  
帝曰不能復相活邪帝曰我亦不知命在何時顧謂慮  
曰郗公天下寧有是邪遂將后下暴室以幽崩所生二  
皇子皆鵞殺之后在位二十年兄弟及宗族死者百餘  
人母盈等十九人徙涿郡

獻穆曹皇后諱節魏公曹操之中女也建安十八年操  
進三女憲節華為夫人聘以東帛元纁五萬匹小者待  
年於國十九年並拜為貴人及伏皇后被弑明年立節

為皇后魏受禪遣使求璽綬后怒不與如此數輩后乃呼使者入親數讓之以璽抵軒下因涕泣橫流曰天不祚爾左右皆莫能仰視后在位七年延康元年魏文帝代漢以后為山陽公夫人自後四十一年為魏景初元年是歲后薨合葬於獻帝禪陵車服禮儀皆依漢制范曄論曰西漢世皇后無諡皆因帝諡以為稱雖呂氏專政上官臨制亦無殊號中興明帝始建先烈之稱其後並以德為配至於賢愚優劣混同一貫故馬竇二后俱

稱德焉其餘皇帝之庶母及蕃王承統以追尊之重特為其號如懷孝崇之比是也初平中蔡邕始追正和熹之謚其安思順烈以下皆依而加焉

漢制皇女皆封縣公主儀服同列侯其尊崇者加號長公主儀服同蕃王諸王女皆封鄉亭公主儀服同鄉亭侯肅宗惟特封東平憲王蒼琅邪孝王京女為縣公主其後安帝桓帝妹亦封長公主同之皇女其皇女封公主者所生之孺襲母封為列侯皆傳國於後鄉亭之封

則不傳襲其職僚品秩各有等差以不足別載故附于  
后紀末

世祖五女

皇女義王建武十五年封武陽長公主適延陵鄉侯太  
僕梁松松坐誹謗誅

皇女中禮十五年封涅陽公主適顯親侯大鴻臚竇固  
肅宗尊為長公主

皇女紅夫十五年封館陶公主適駙馬都尉韓光光坐

與淮陽王延謀反誅

皇女禮劉十七年封涑陽公主適陽安侯長樂少府郭璜璜坐與竇憲謀反伏誅

皇女綬二十一年封酈邑公主適新陽侯世子陰豐豐害主誅死

顯宗十一女

皇女姬永平二年封獲嘉長公主適陽邑侯將作大匠馮柱

皇女奴三年封平陽公主適大鴻臚馮順

皇女迎三年封隆慮公主適牟平侯耿襲

皇女次二年封平氏公主

皇女致三年封沁水公主適高密侯鄧乾

皇女小姬十二年封平臯公主適昌安侯侍中鄧蕃

皇女仲十七年封浚儀公主適軼侯黃門侍郎王度

皇女惠十七年封武安公主適征羗侯世子黃門侍郎

來校安帝尊為長公主



皇女臣建初元年封魯陽公主

皇女小迎元年封樂平公主

皇女小民元年封成安公主

肅宗三女

皇女男建初四年封武德長公主

皇女王四年封平邑公主適黃門侍郎馮由

皇女吉永元五年封陰安公主

和帝四女

皇女保延平元年封脩武長公主

皇女成元年封共邑公主

皇女利元年封臨潁公主適即墨侯侍中賈建

皇女興元年封聞喜公主

順帝三女

皇女生永和三年封舞陽長公主

皇女成男三年封冠軍長公主

皇女廣永和六年封汝陽長公主

桓帝三女

皇女華延熹元年封陽安長公主適不其侯輔國將軍  
伏完

皇女堅七年封潁陰長公主

皇女脩九年封陽翟長公主

靈帝一女

皇女某光和三年封萬年公主

右皇女三十人雖無可書之事史家存之亦足

以見一代之制云

魏

陳壽曰易稱男正位乎外女正位乎內男女正天地之  
大義也古先哲王莫不明后妃之制順天地之德故二  
妃嬪媯虞道克隆任姒配姬周室用熙廢興存亡恒此  
之由春秋說云天子十二女諸侯九女考之情理不易  
之典也而末世奢縱肆其侈欲至使男女怨曠感動和  
氣惟色是崇不本淑懿故風教陵遲而大綱毀泯豈不

惜哉嗚呼有國有家者其可以永鑒矣漢制帝祖母曰  
太皇太后帝母曰皇太后帝妃曰皇后其餘內官十有  
四等魏因漢法母后之號皆如舊制自夫人以下世有  
增損太祖建國始命王后其下五等有夫人有昭儀有  
婕妤有容華有美人文帝增貴嬪淑媛脩容順成良人  
明帝增淑妃昭華脩儀除順成官太和中始復命夫人  
登其位於淑妃之上自夫人以下爵凡十二等貴嬪夫  
人位次皇后爵無所視淑妃位視相國爵比諸侯王淑

媛位視御史大夫爵比縣公昭儀比縣侯昭華比鄉侯  
脩容比亭侯脩儀比關內侯倬仔視中二千石容華視  
真二千石美人視比二千石良人視千石

武宣卞皇后琅邪開陽人文帝母也本倡家后初生於  
齊郡白亭有黃氣滿室移日其父怪之以問卜者王旦  
旦曰此吉祥也年二十太祖於譙納之為妾後隨至洛  
太祖微服東避董卓亂袁術傳太祖凶問時太祖左右  
皆欲歸后止之曰曹君吉凶未可知今日還家明日若

在何面目復相見也正使禍至共死何苦遂從后言太祖間而善之建安初丁夫人廢遂以后為繼室諸子無母者太祖皆令后養之文帝為太子左右長御賀后曰將軍拜太子天下莫不歡喜后當傾府藏賞賜后曰王自以丕年長故用為嗣我但當以免無教導之過為幸耳亦何為當重賜遺乎長御還以告太祖太祖說曰怒不變容喜不失節故是最為難二十四年拜為王后明年太祖崩文帝即王位尊后曰王太后及踐阼尊后曰

皇太后稱永壽宮后性儉約又以國用不足減損御食  
諸金銀器物皆去之東阿王植太后少子最愛之後植  
犯法為有司所奏文帝令太后弟子奉車都尉蘭持公  
卿議白太后太后曰不意此兒所作如是汝還語帝不  
可以我故壞國法及自見帝不以為言

裴松之案文帝  
夢磨錢欲使文

減而更愈明以問周宣宣荅曰此陛下家事雖意欲  
爾而太后不聽則太后用意不得如此書所言也明

帝即位尊太后曰太皇太后黃初中文帝欲追封太后  
父母尚書陳羣奏曰案典籍之文無婦人分土命爵之



制在禮婦因夫爵秦違古法漢氏因之非先王之令典也帝曰此議是也其勿施行以作著詔下藏之臺閣永為後式至太和四年春明帝乃追謚太后祖父廣曰開陽恭侯父遠曰敬侯祖母周封陽都君及恭侯夫人皆贈印綬其年五月后崩合葬高陵初太后弟秉以功封都鄉侯為昭烈將軍秉薨子蘭嗣少有才學為奉車都尉游擊將軍加散騎常侍蘭薨子暉嗣又分秉爵封蘭弟琳為列侯官至步兵校尉蘭子隆女為高貴鄉公主

后隆以后父為光祿大夫位特進封睢陽鄉侯妻王為顯陽鄉君追封隆前妻劉為順陽鄉君后親母故也琳女又為陳留王皇后時琳已沒封琳妻劉為廣陽鄉君文昭甄皇后中山無極人明帝母漢太保甄邯後也世吏二千石父逸上蔡令后生三歲失父后以漢光武五年十二月丁酉生每寢寐家中髣髴見如有人持玉衣覆其上者常共怪之后自少至長不好戲弄年八歲外有立騎馬戲者家人諸姊皆上閣觀之后獨不行諸姊

問之后曰此豈女人之所觀邪年九歲喜書視字輒識  
數用諸兄筆硯兄謂后曰汝當習女工用書為學當作  
女博士邪后答言聞古者賢女未有不學前世成敗以  
為已誠不知書何由見之後天下兵亂加以饑饉百姓  
皆賣金銀珠玉寶物時后家大有儲穀頗以買之后年  
十餘歲白母曰今世亂而多買寶物匹夫無罪懷璧為  
罪又左右皆饑乏不如以穀振給親族隣里廣為恩惠  
也舉家稱善即從后言建安中袁紹為中子熙納之熙

出為幽州后留養姑及鄴城破紹妻劉及后共坐皇堂  
上文帝入紹舍見紹妻及后后怖以頭伏姑膝上紹妻  
兩手自搏文帝謂曰劉夫人云何如此令新婦舉頭姑  
乃捧后令仰文帝就視見其顏色非凡稱歎之

又說文  
帝初入

有婦人被髮垢面垂涕立紹妻劉後帝問之劉荅  
是照妻顧覽髮髻以袖拭面其貌絕倫遂見納焉姑謂

后曰不憂死矣文帝遂迎納之甚有寵生明帝及東鄉

公主延康元年正月文帝即王位六月南征后留鄴黃  
初元年十月帝踐阼之後山陽公奉二女以嬪于魏郭

后李陰貴人並愛幸后愈失意有怨言帝大怒二年六月遣使賜死葬于鄴及明帝即位有司奏請追謚於是上尊謚曰文昭皇后使司空王朗持節奉策以太牢告祠于陵又別立寢廟太和元年三月以中山魏昌之安城鄉千戶追封逸謚曰敬侯適孫像襲爵四月初營宗廟掘地得玉璽方一寸九分其文曰天子羨思慈親明帝為之改容以太牢告廟又嘗夢見后於是差次舅氏親疎高下叙用各有差賞賜累鉅萬以像為虎賁中郎

將是月后母薨帝制總服臨喪四年十二月帝以后陵  
庫下使像兼太尉持節詣鄴昭告后土改葬朝陽陵像  
還遷散騎常侍青龍二年春追諡后兄儼曰安成鄉穆  
侯夏吳人寇揚州以像為伏波將軍持節監諸將東征  
還復為射聲校尉三年薨追贈衛將軍改封魏昌縣謚  
曰貞侯子暢嗣又封暢弟溫韓豔皆為列侯四年改逸  
儼本封皆曰魏昌侯謚因故封儼世婦劉為東鄉君又  
追封逸世婦張為安喜君景初元年有司議定七廟以

文昭皇后特廟宜與祖廟同著不毀之典帝思念舅氏  
不已暢尚幼景初末以暢為射聲校尉加散騎常侍名  
暢所居里曰渭陽里以追思母氏也嘉平三年暢薨贈  
車騎將軍謚曰恭侯子紹嗣太和六年明帝愛女淑薨  
追封謚淑為平原懿公主為之立廟取后亡從孫黃與  
合葬追封黃列侯以夫人郭氏從弟惠為之後承甄氏  
姓封惠為平原侯襲主爵青龍中又封后從兄子毅及  
像弟三人皆為列侯毅官至越騎校尉嘉平中復封暢

子二人為列侯后兄儼孫女為齊王皇后后父已歿封  
后母為廣樂郡君

文德郭皇后安平廣宗人祖世長史父永官至南郡太  
守后少而永奇之曰此乃吾女中王也遂以女王為字  
早失二親喪亂流離沒在銅鞮侯家太祖為魏公時得  
入東宮后有智數時時有所獻納文帝定為嗣后有謀  
焉文帝即王位后為夫人及踐阼為貴嬪黃初三年將  
登后位文帝欲立郭后中郎棧潛上疏言因愛登后使



賤人暴貴不可為後世法文帝不從遂立為皇后后蚤喪兄弟以從兄表繼永後拜奉車都尉五年帝東征后留許昌永始臺時霖雨百餘日城樓多壞有司奏請移止后曰昔楚昭王出遊貞姜留漸臺江水至使者迎而無符不去卒沒今帝在遠吾幸未有是患而便移止柰何群臣莫敢復言六年帝東征吳至廣陵后留譙宮時表留宿衛欲遏水取魚后曰水當通運漕又少材木奴客不在目前當復私取官竹木作梁遏今奉車所不足

者豈魚乎后性節儉常慕漢明德馬后之為人明帝即位尊后為皇太后稱永安宮太和四年詔封表安陽亭侯又進爵鄉侯遷中壘將軍以表子詳為騎都尉其年帝追謚太后父永為安陽鄉敬侯母董為都鄉君遷表昭德將軍加金紫位特進表第二子訓為騎都尉青龍三年春后崩于許昌初甄后之誅由郭后之譖及殯令被髮覆面以糠塞口文帝遂立郭后使養明帝甄后臨沒以帝屬李夫人帝立李夫人密啟甄后見譖之禍不

獲大歛被髮之事帝哀恨流涕心常懷忿數問甄后死  
狀於郭后后曰先帝自殺何以責問我且汝為人子可  
追讎死父為前母枉殺後母邪明帝怒遂逼殺之勅殯  
者使如甄后故事葬首陽陵西其後帝復進表爵為觀  
津侯增其邑戶遷詳為駙馬都尉四年追改封永為觀  
津敬侯世婦董為堂陽君追封謚后兄浮為梁里亭戴  
侯都為武城亭孝侯成為新樂亭定侯皆使使者奉策  
祠以太牢表薨子詳嗣又分表爵封詳弟述為列侯詳

薨子釗嗣

明悼毛皇后河內人也黃初中以選入東宮明帝時為平原王進御有寵出入與同輿輦及即帝位以為貴嬪太和元年立為皇后后父嘉拜騎都尉后弟曾郎中初明帝為王始納河內虞氏為妃帝即位虞氏不得立為后太皇太后慰勉焉虞氏曰曹氏自好立賤未有能以義舉者也然后職內事君聽外政其道相由而成苟不能以善始未有能令終者也殆必由此亡國喪祀矣

虞氏遂黜還鄴宮進嘉為奉車都尉曾騎都尉寵賜隆  
渥頃之封嘉博平鄉侯遷光祿大夫曾駙馬都尉嘉本  
典虞車工卒暴富貴明帝令朝臣會其家飲宴其容止  
舉動甚蚩駘語輒自謂侯身時人以為笑後又加嘉位  
特進曾遷散騎侍郎青龍三年嘉薨追贈光祿大夫改  
封安國侯增邑五百并前千戶諡曰節侯四年追封后  
母夏為野王君帝之幸郭元后也后愛寵日弛景初元  
年帝遊後園召才人以上曲宴極樂元后曰宜延皇后

帝弗許乃禁左右使不得宣后知之明日帝見后后曰  
昨日遊宴北園樂乎帝以左右泄之所殺十餘人賜后  
死然猶加謚葬愍陵遷曾散騎常侍後徙為羽林虎賁  
中郎將原武典農

明元郭皇后西平人也世河右大族黃初中本郡反叛  
遂没入宮明帝即位甚見愛幸拜為夫人叔父立為騎  
都尉從父芝為虎賁中郎將帝疾困遂立為皇后齊王  
即位尊后為皇太后稱永寧宮追封謚太后父滿為西

都定侯以立子建紹其爵封太后母杜為邵陽君芝遷散騎常侍長水校尉立宣德將軍皆封列侯建兄惠出養甄氏惠及建俱為鎮護將軍皆封列侯並掌宿衛值三主幼弱宰輔統政與奪大事皆先咨於太后而後施行母邱儉鍾會等作亂咸假其命而以為辭焉景元四年十二月崩五年二月葬高平陵西

蜀

先主甘皇后沛人也先主臨豫州住小沛納以為妾先

主數喪嫡室常攝內事隨先主於荊州產後主值曹公  
軍至追及先主於當陽長阪于時困逼棄后及後主賴  
趙雲保護得免於難后卒葬于南郡章武二年追諡皇  
思夫人遷葬於蜀未至而先主殂隕丞相亮與太常臣  
賴恭等議上尊諡曰昭烈皇后與先主合葬惠陵

先主穆皇后陳留人也兄吳壹少孤壹父素與劉焉有  
舊是以舉家隨焉入蜀焉有異志而聞善相者相后當  
大貴焉時將子琬自隨遂為琬納后琬死后寡居先主



既定益州而孫夫人還吳群下勸先主聘后先主疑與  
瑁同族法正進曰論其親疎何與晉文之於子圉乎於  
是納后為夫人建安二十四年立為漢中王后章武九  
年立為皇后建興元年五月後主即位尊后為皇太后  
稱長樂宮壹官至車騎將軍封縣侯延熙八年后薨合  
葬惠陵

後主敬哀皇后車騎將軍張飛長女也章武元年納為  
太子妃建興元年立為皇后十五年薨葬南陵

後主張皇后前后敬哀之妹也建興十五年入為貴人  
延熙元年春立為皇后咸熙元年隨後主遷于洛陽

吳

孫破虜吳夫人吳主權母也本吳人徙錢塘早失父母  
與弟景居孫堅聞其才貌欲娶之吳氏親戚嫌堅輕狡  
將拒焉堅甚以慚恨夫人謂親戚曰何愛一女以取禍  
乎如有不遇命也於是遂許為婚初夫人孕而夢月入  
其懷既而生策及權在孕又夢日入其懷以告堅曰昔

姪策夢月入我懷今也又夢日入我懷何也堅曰日月  
者陰陽之精極貴之象吾子孫其興乎生四男一女景  
常隨堅征伐有功拜騎都尉表術上景領丹陽太守討  
故太守周昕遂據其郡孫策與孫河呂範依景合衆共  
討涇縣山賊祖郎郎敗走會景為劉繇所逼復北依術  
術以為督軍中郎將與孫賁共討樊能于麋於橫江又  
擊笮融薛禮於秣陵時策被創牛渚降賊復反景攻討  
盡禽之從討劉繇繇奔豫章策遣景賁到壽春報術術

方與劉備爭徐州以景為廣陵太守術後僭號策以書  
喻術術不納便絕江津不與通使人告景景即委郡東  
歸策復以景為丹陽太守漢遣議郎王誦銜命南行表  
景為揚武將軍領軍如故及權少年統業夫人助治軍  
國甚有補益初策功曹魏騰以逆意見譴將殺之士大  
夫憂恐計無所出夫人乃倚大井而謂策曰汝新造江  
南其事未集方當優賢禮士捨過錄功魏功曹在公盡  
規汝今日殺之則明日人皆叛汝吾不忍見禍之及當

先投此井中耳策大驚遂釋騰夫人智略權譎類皆如此建安七年臨薨引見張昭等屬以後事合葬高陵八年景卒官子奮授兵為將封新亭侯卒子安嗣安坐黨魯王霸死奮弟祺封都亭侯卒子纂嗣纂妻即滕允女也允被誅并遇害

吳主權謝夫人會稽山陰人也父斐漢尚書郎徐令權母吳為權聘以為妃愛幸有寵後權納姑孫徐氏欲令謝下之謝不肯由是失志早卒後十餘年弟承拜五官

郎中稍遷長沙東部都尉武陵太守撰後漢書百餘卷  
吳主權徐夫人吳郡富春人也祖父真與權父堅相親  
堅以妹妻真生琨琨少仕州郡漢末擾亂去吏隨堅征  
伐有功拜偏將軍堅薨隨孫策討樊能于麋等於橫江  
擊張英於當利口而船少欲駐軍更求琨母時在軍中  
謂琨曰恐州家多發水軍來逆人則不利矣如何可駐  
邪宜伐蘆葦以為泚佐船渡軍琨具啟策策即行之衆  
悉俱濟遂破英擊走笮融劉繇事業尅定策表琨領丹

陽太守會吳景委廣陵來東復為丹陽守琨以督軍中  
郎將領兵從破廬江太守李術封廣德侯遷平虜將軍  
後從討黃祖中流矢卒琨生夫人初適同郡陸尚尚卒  
權為討虜將軍在吳聘以為妃使母養子登後權遷移  
以夫人妬忌廢處吳積十餘年權為吳王及即尊號登  
為太子羣臣請立夫人為后權意在步氏卒不許後以  
疾卒兄矯嗣父琨侯討平山越拜偏將軍先夫人卒無  
子弟祚襲封亦以戰功至于蕪湖督平魏將軍

吳主權步夫人臨淮淮陰人也與丞相隲同族漢末其  
母攜將徙廬江廬江為孫策所破皆東渡江以美麗得  
幸於權寵冠後庭生二女長曰魯班字大虎前配周瑜  
子循後配全琮少曰魯育字小虎前配朱據後配劉纂  
夫人性不妬忌多所推進故久見愛待權為王及帝意  
欲以為后而羣臣議在徐氏權依違者十餘年然宮內  
皆稱皇后親戚上疏稱中宮及薨臣下緣權指請追正  
名號乃贈印綬策為皇后葬蔣陵



吳主權王夫人琅邪人也夫人以選入宮黃武中得幸  
生孫和寵次步氏步氏薨後和立為太子權將立夫人  
為后而全公主素憎夫人稍稍譖毀及權寢疾言有喜  
色由是權深責怒以憂死和子皓立追贈夫人曰大懿  
皇后封三弟皆為列侯

吳主權王夫人南陽人也以選入宮嘉禾中得幸生孫  
休及和為太子和母貴重諸姬有寵者皆出居外夫人  
出公安卒因葬焉休即位遣使追尊曰敬懷皇后改葬

敬陵王氏無後封同母弟文雍為亭侯

吳主權潘夫人會稽句章人也父為吏坐法死夫人與姊俱輸織室權見而異之召充後宮得幸有娠夢有以龍頭授已者已以蔽膝受之遂生孫亮赤烏十三年亮立為太子請出嫁夫人之姊權聽許之明年立夫人為皇后性險妬容媚自始至卒譖害袁夫人等甚眾權不豫夫人使問中書令孫弘呂后專制故事侍疾疲勞因以羸疾諸宮人伺其昏卧共縊殺之託言中惡後事泄

坐死者六七十人權尋薨合葬蔣陵孫亮即位以夫人姊  
壻譚紹為散騎都尉授兵亮廢紹與家屬送本郡廬陵  
孫亮全夫人全尚女也尚從祖母公主愛之每進見輒  
與俱及潘夫人母子有寵全主自以與孫和母有隙乃  
勸權為潘氏男亮納夫人亮遂為嗣夫人立為皇后以  
尚為城門校尉封都亭侯代滕允為太常衛將軍進封  
永平侯錄尚書事時全氏侯有五人並典兵馬其餘為  
侍郎騎都尉宿衛左右自吳興外戚貴盛莫及及魏大

將諸葛誕以壽春來附而金懌全端全煒全儀等並因此際降魏全熙謀泄見殺由是諸全衰弱會孫綝廢亮為會稽王後又黜為候官侯夫人隨之國居候官尚將家屬徙零陵追見殺

孫休朱夫人朱據女休姊公主所生也赤烏末權為休納以為妃休為琅邪王隨居丹陽建興中孫峻專政公族皆患之全尚妻即峻姊故惟全主祐焉初孫和為太子時全主諧害王夫人欲廢太子立魯王朱主不聽由

是有隙五鳳中孫儀謀殺峻事覺被誅全主因言朱主與儀同謀峻枉殺朱主休懼遣夫人還建業執手泣別既至峻遣還休太平中孫亮知朱主為全主所害問朱主死意全主懼曰我實不知皆據二子熊損所白亮殺熊損損妻是峻妹也孫綝益忌亮遂廢亮立休永安五年立夫人為皇后休卒群臣尊夫人為皇太后孫皓即位月餘貶為景皇后稱安定宮甘露元年七月見逼薨合葬定陵

孫和何姬丹陽句容人也父遂本騎士孫權嘗遊幸諸營而姬觀於道中權望見而異之命宦者召入以賜子和生男權喜名之曰彭祖即皓也太子和既廢後為南陽王居長沙孫亮即位孫峻輔政峻素媚事全主全主與和母有隙遂勸峻徙和居新都遣使賜死嫡妃張氏亦自殺何姬曰若皆從死誰當養孤遂拊育皓及其三弟皓即位尊和為昭獻皇帝何姬為昭獻皇后稱升平宮月餘進為皇太后封弟洪永平侯蔣溧陽侯植宣城

侯洪卒子邈嗣為武陵監軍為晉所殺植官至大司徒  
皓末昏亂何氏驕譖子弟橫放百姓患之故民謠言皓  
久死立者何氏子云

孫皓滕夫人故太常允之族女也允夷滅夫人父牧以  
疎遠徙邊郡孫休即位大赦得還以牧為五官中郎皓  
既封烏程侯聘牧女為妃皓即位立為皇后封牧高密  
侯拜衛將軍錄尚書事後朝士以牧尊戚頗推令諫諍  
而夫人寵漸衰皓滋不悅皓母何恒左右之又太史言

於運歷后不可易皓信巫覡故得不廢常供養升平宮  
牧見遣居蒼梧郡雖爵位不奪其實謫也遂道路憂死  
長秋宮僚備員而已受朝賀表疏如故而皓內諸寵姬  
佩皇后璽綬者多矣天紀四年隨皓遷于洛陽



通志卷十九